

Marakos wasaniha Sesus soho ziwatahaka

Marakos Sesus humo ispirikpota. Sesus mybarawy eze ziknapykyrykze iwazeka Marakos mykyryburuk zikzuruku iwatahi batu ituk pão. Sesus tazo bo ziksizoze Deus hyrikoso ziapewywyky iwaze hi Sesus ziknakara naha ty Marakos ziwatahaka.

Suão Batista mypehawy kytsa bo nitsasoko.

¹ Papeu humo Deus wasania ty Sesus Kiristu soho ziwatahaka. Sesus Kiristu Deus tse. ² Ata hi mybarawy bo inasikta ana kino Deus sohotsa Isaijas botu ziwatahaka. Isaijas hawa niy, tubabatu ziwatahaka tahi:

— Tapara katsumuẽtsa aharaze pipeha.

Hawa katsa myske piskezozeke atahi aske piwatawy. Piskezozeke.

³ Atahi jerukbara eze hua mykara

“Pykyhytuty Deus zipehata ske buruk tsimaha.

Tsipiskezozeknaha.

Iske buruhuwa tu taha.

Iwa iske takymy” iwaze Deus zipehata mozumuze mokuru — niy.

Iwa Deus sohokotsa niy. Hawa kytsa mokymynaha Deus zipehata harere bo yhy mykaranaha ana hi motsasoko.

⁴ Anaharere wa Suão Batista jerukbara bo izumu. Anaeze Deus harere nitsasoko kytsa nisi-harasusuku. Atahi:

— O kytsa ahamysapybyi tsmoewynahaktsa tynamyharasusukta! Tsipiharasusunaha zeka iwatawy kytsa bo meky watu tsmoziknaha, ahamysapybyitsa tsikykaranaha tsmoewy tsihikiknaha — niy. Iwaze Deus ahamysapybyitsa tsikykaranaha humo pahaokzohik.

⁵ Sizubarêtsa Suão Batista bo zumukunaha. Serusarêhe ezektsa Sudeja ezektsa iwatsa ibo ziknakaranaha. Suão sizubarêtsa ziknasiharasusuku. Nisiharasusukuze asa kino:

— Tapara mysapybyitsa tsikykaranaha. Abaka batu meky watu tsmoziknaha mysapybyi tsikykaranaha anahi tamoewy tsihikik — nikaranaha.

⁶ Suão kamero hwyk zikziwaskik niy. Irik-pidiwy kino kamero hwyk. Masetsa ziknasi-boroko. Pete zikzerukuk ziknakara. ⁷ Myzubaha bo ziknatsasokoze:

— Usta mozumuze. Atahi tsmysapyrêta, iwatahi myhyrizikwani. Utakta batu. Iwatahi kasikpybyrêta. Ipyrysuktsa mysibobokzeka kasikpybyrêta mozik.

⁸ Utakta pihik ty zuba kytsa mysiharasusuku. Atakta Deus hyrikoso pipehaka. Mynasikze ahatuk mynapykyryk iwatsahi ihumo meky watu ahamysapyrêtsa tsmoziknaha — niy.

Sesus harasuwy.

⁹ Iwaze Sesus Suão bo izumu. Nasare iknykta. Nasare Karireja eze tu. Suão bo zumuze, taharasusu tsihikik iwatahi ibo zumu. Suão buburu Sorodão inarokota eze kytsa nisiharasusuku. Anaeze hi Sesus kino ziharasu.

¹⁰ Pihik ikny inazoze atsoko bijoikpe sakpare

iktša niy. Deus hyrikoso ibo inasik, amyvodu hyrity wata ibo inasik. ¹¹ Iwaze bijoikpe ikny iaksoho ziwaby Deus hi:

— Ikia hi katse babata. Ikia humo ka kamypokz-itsiarêta. Ikia humo kakurêta — niy. Iwa Deus Sesus pe niy.

Sesus jerukbara bo niy. Anaeze Satanas zimiywy tshikik.

¹² Iwaze Deus hyrikoso hi Sesus jerukbara bo zioқтыhyryk. ¹³ Anaeze estuba byzoje zirahaze. Kuarêta zuruze anaeze ziknapykyryk. Anaeze sasabyitsa niaha. Satanas hyrikoso sapybara pehatsa Sesus Deus harere bo ka yhybyitykta nizihikik. Batu zik. Sesus ipe batu yhy niy. Iwaze bijoikpe iknyktsitsa Deus tsumuêhîtsitsa Sesus ziperyknaha. Iwa de

Sesus Karireja eze Deus wasania ty ziakbata motsasoko.

¹⁴ Kytsa Suão Batista tsipa humo sakyriukrênikitsa hurukwy bo zioқтыhyryknaha. Iwaze Sesus Karireja bo ziksizo Deus harere wasania ty nitsasoko. ¹⁵ Atahi:

— Nawa zuruze kytsa Deus tyryktsa moziknahaze mozumu. Abaka kytsa Deus tyryktsa moziknaha. Iwatsahi ahamysapybyri tsimoewynahaktsa! Deus harere bo zuba hyhy tahaktsa — niy.

¹⁶ Kyze Sesus pihikzotsabyri sak taba Karireja inarokota eze niy. Ana buruk ziknaukuruze petoktsahatsa, ziktsikpaparakannahatsa bo nikozo. Peduru inarokota itsy tihi Âdere iwahatsa tōhōryk pihik bo zioktsotsokoknaha. ¹⁷ Sesus ispe niy:

— Uta kapikta! Tapara tsitsikpapakana haze piknutsa ziknasizokonaha. Abaka, uta katuk, mekywatsatu tsimysitsumuēhīnaha. Kytsa bo Deus soho tsimytsasonaha. Ahaharere humo kytsa Deus harere bo hyĩ mykaranaha — niy.

¹⁸ Iwaze atsoko tahatōhōryk zerekbaiknaha. Iapik niukurunaha.

¹⁹ Sesus puētsik pāozo niyze mektsa bo tu nikozozo. Tsiaku Suāo ahatsa tahazo Sebedeu tuk. Suāo, Tsiaku tsy niy. Tsaraha ezektsa tu, tahatōhōryk pykyhytu zizozikiknaha. ²⁰ Atsoko Sesus nisihuahua:

— Uta kapikta — niy.

Hyĩ niaha. Iwaze tahazo ty ka tsaraha eze, tatsumuēhītsitsa baze zerekeknaha. Sesus tuk niukurunaha.

Ihyrikoso sapybyita maku tuk ziknakara iwatahi Sesus ziksiwyhik.

²¹ Kyze Kapananaũ eze, Sesus Deus wahoro bo nitsuk, Sudeutsa zinymyrykynahatsa wahoro bo nitsuk. Sabado, nawa zuruze Sudeutsa byrykywy Sesus siwahoro anaeze inakypyknahaze nisihyrinymyryky. ²² Kytsa ziwabykynahaze:

— Atakta tsimysapyrēta hawa mymyhyrinymyryky naha wasani mykara. Ta hi myhyrinymyrykytsa. Moises harere zinymyrykynahatsa batu sihyrinymyryziu — niaha. Sipybyrētsa paikpa iktsa nikaranaha.

²³ Iwaze maku anaeze nitsuk. Ihyrikoso sapybara ibo pororo ziknakara. ²⁴ Sesus bo iktsa niyze ipokso kakaik niy:

— Amy skaraba mybo tsimyzumuku, Sesus Nasare ezekta. Mype nabo pāoty tsimy. Ikia

mynyhy Deus zapehata tsimysapyrëta. Ikia mopyk sa — niy. ²⁵ Sesus:

— Aksobyitykta! Nabo päotyкта! — niy.

²⁶ Ihyrikoso sapybara humo maku hi nitydydykyk tu kakaik niy, niwakik. Batu ity nyzo.

²⁷ Kytsa sizubarëtsa ibaze tutsa nipybybaiknaha.

— O amy skaraba ihyrinymyrywy ezytyk ja Sesus hyrikoso sapybara pe: “Nabo päotaha” myze, hyñ sisopyk — niaha. Iwatsahi kytsa nipybybaiknaha.

²⁸ Iwatahi sizubarëtsa nanabyitaba Karireja eze Sesus niyhaty ziwabykynaha.

Sesus Simaõ wapyry zizororowy.

²⁹ Iwaze Sesus wahoro eze ziponaha iwaze Tsiaku, Suão, ahatsa tuk Simaõ Ádere siwahoro bo nipupunaha. ³⁰ Simaõ wapyry ihumuëzumu.

— O Simaõ wapyry ihumuëzumu — niaha.

³¹ Sesus iwanu sapy bo zumuze, itsyhyrype humo paik niy. Itsyhyrype humo tyzikto niyze nizororo. Iwaze ihumuëzukbyitatsa tu nisidisahawyky.

Sesus simyitsapyritsa nisizororowy.

³² Kyze zunubazoze Sudeu byrywy nepyk iwaze Kaparanaũ Ezektsa simyitsapyritsa Sesus bo nasioktyhyryknaha. Kytsa sipiakmyitsa hyrikosotsa simysapybaratsa humo sibo pororo ziknakarannahatsa. Asa kino Sesus bo nasioktyhyryknaha.

³³ Kytsa ape baze sizubarëtsa wahoro peze niriktotohokonaha. ³⁴ Iwaze Sesus meky mekywatu simyitsapyritsa ty nisizororowyky. Sihyrikosotsa sapybaratsa hi nisiksiwyhik. Ispe:

— Nabo pãotaha — myze iharere bo hyỹ sisopyk niaha. Hyrikoso sapybara Sesus humo sihyrinymyrẽtsa atahi Deus zipehata zinymyrykynaha iwatahi Sesus ispe niy:

— Soso byitaha — niy. Iwatsahi batu harere.

Sesus Karireja eze.

³⁵ Kyze zokorobyitu Sesus inapopoze jerukbara bo niparak. Anaeze Deus bo nipamykysoko. ³⁶ Iwaze Simaõ tuktsa ziberikinaha. ³⁷ Zihobyknahaze ipe niaha:

— Kytsa sizubarẽtsa paberikinaha — niaha.

³⁸ Sesus ispe niy:

— Utsa hudikhudikwy boktsa kytsa! Si-hudikhudikwy bytykareze tu. Anabo Deus wasania ty motsaso ana humo hi ikzumu — niy.

³⁹ Iwaze Karireja buruk niukurunaha. Sesus Sudeutsa wahoro bo nitsuk. Anaeze wasania ty nitsasoko. Sihyrikosotsa sapybaratsa nisiksi-wyhik iwa zikzuruku.

Maku inakõrõrõbaikta humo zizororowy.

⁴⁰ Maku inakõrõrõbaikta humo asiba nibibibata zizororowy. Maku nakõrõrõbaikta Sesus bo izumu. Atahi Sesus okeryk taekaratsa humo puruk puruk niy. Sesus humo tispirikporẽta nikara iwatahi puruk puruk niy. Ipe niy:

— Ikia tsipitsihikik zeka tsipikzororowy — niy.

⁴¹⁻⁴² Iwaze Sesus ihumo tsimypokzitsiarẽta tatsyhyrype ty humo paik niy. Ipe:

— Yhỹ ana hi mozihikik pazororowy. Aba pazororowy hỹ — niy. Atsoko iakõrõrõtsa nihokdanaha. Zizororowyhik. ⁴³⁻⁴⁴ Sesus zipehaka:

— Sosobyity. Batu aty tohi bo ziksaso. Aba ikia Deus wahoro bokta! Ziknapamykysokota bo tsikawatawykta. Niytahi amy tudutsa ty ikia petoktsa ty Deus bo nyny tsimy.

Iwa taparakta Moises tubabatu ziwatahaka papu humo atsatu tsimy. Tsimyze kytsa sizubarētsa tsikzororo baba sihyrinymyrētsa. Ikia azororowy soho batu tyso — niy.

⁴⁵ Nizororo tahi niparak. Iwata tu Sesus ipe:

— Sosobyity — atahi Sesus soho ty nipamykysoko. Nanabyitaba kytsa sizubarētsa bo tazōrōrōwy soho nitsasoko. Iwatahi Sesus sihudikhudikwy bo batu zukzo. Jerukbara eze kytsa pokso nitare. Iwatsa tu kytsa sizubarētsa ibo niukurunaha.

2

Sesus ityryk niakbata zizororowy.

¹ Kyze byi puētsik Sesus Kaparanaū bo ziksizo. — O Sesus ziksizo — nikaranaha. ² Iwaze myzubaha ibo nikozenaha. Wahoro inahareknaha batu iwewehe. Ape baze hokbowy baze, sizubarētsa niriktotohokonaha. Deus soho ty sibo nipamykysoko. ³ Iwaze ustsā kytsa izumukunaha. Sapetoktsa sapetoktsa ahatsa izumunaha. Ityryk niakbata hi ibo izebykyryknaha. Batu hawa tohi zikaha. ⁴ Kytsa sizubarētsa izihyryzabaiknaha. Iwatsahi batu Sesus bo zuk niaha. Iwatsahi wahoro harapu nidokoknaha. Zipeksykiknaha. Zipeksykiknahaze ityryk niakbata hi iwanu bete inaripiknaha. Sesus bo imyitsapyrita inaripiknaha. ⁵ Iwaze Sesus iharereziuwytā pe niy:

— O kytsa, “Sesus myhumo tsimypokzit-siukrēta” tsimaha. Iwatahi ikiahatsa humo kakurēta — niy. Iwaze ityryk niakbata pe:

— O katukytsa wata “Kamysapybyita” tsimy kara. “Deus harere bo batu yh̄y mykara” tsimy. Iwahatu paokzohik. Asopyksapybyita tu tsimy kara paokzohik — niy.

⁶ Moises harere zinymyrykynahatsitsa, ibaze tu tsahi iharere humo tahakyrikinaha.

⁷ — Amo skaraba nitsasoko. Atahi isopyksapybyita mykara Deus zuba: paokzohik mykara — mytsaty nikaranaha.

⁸ Kytsa iwa mytsaty nikaranaha, Sesus tsihyrinymyrēta iwaze ispe niy:

⁹ — O hawa tuza kytsa “Iwahatu, paokzohik” my zeka tsihokdaharēna. “Kyiktykta” my zeka, ana kino tsihokdaharēna. ¹⁰ Iwatu utakta wyzik niwatihi my — niy. ¹¹ Ityryk niakbata pe tihi:

O papeha. — Kyiktykta! Awanu ty pohyrykty! Tsiksikta!

¹² Iwaze atsoko itarikto. Tawanu ty kokpuhyryk niy. Kytsa nikozonehatsa nipybybaiknaha:

— O Deus ahumo mykurētsa. Iwa batu ityny — asa zuba nipamykysonaha.

Rewi Sesus hapik niukuru.

¹³ Iwaze Sesus niparakzo Karireja buruk pihikzotsabyri sak bo zukzo niy. Kytsa sizubarētsa zikziberikinaha. Zihobyknaha siwatu ziknasihyrynyky. ¹⁴ Niukuruze Rewi bo iktsa niy. Rewi Arapeu tse. Atahi siokyrysarobykyktsitsa sipehakatsa tsihyryze nikara. Atakta

siokyrýsarobykwy sapy eze ziknadyhyky, Sesus ipe niy:

— Panykta! Katuk! — niy.

Yhỹ niy. Niytahi atsoko kyikykyk Sesus tuk niukuru. Tanamy zeregbaik.

¹⁵ Kyze Sesus Rewi wahoro eze tadisahaka. Kytsa siokyrýsarobyktsitsa sipehakatsa tsyhyryze tahadisahanaha. Sesus tuk zinymyrykynahatsa, kytsa simysapybyitsa iwa ahatsa tahadisahanaha. Tummy zikukunaha. ¹⁶ Pariseutsa asaktsa Moises harere humo sihyrinymyrẽtsa ana bo iktsa niahaze tahakyrikinaha. Siokyrýsarobyktsitsa, kytsa simysapybyitsa tuk iwa tahadisahanaha ana bo hi iktsa niahaze tahakyrikinaha. Sesus tuk zinymyrykynahatsa nisibetsakaknaha:

— Amo skaraba mykara. Atakta siokyrýsarobykyktsa tuk tadisahaka. Simysapybyitsa tuk tummy mozikuku — niaha.

¹⁷ Sesus siharere ziwabyze ispe niy:

— Sakurẽtsaktsa batu myzororowytsa bo ba zikumunaha. Simyitsapyritsa zuba mozororowytsa bo pomonaha. Simysapybyitsa simyitsapyritsa watsa niy. Iwaze ikzumu, iwatahi simysapyrẽtsa bo batu zuk iky. Uta simysapybyitsa bo ikzumu — Sesus niy.

Sesus hauk ahabyita soho humo nisi-hyrinymyryky.

¹⁸ Kyze estuba okoroze Suão Batista tuk zinymyrykynahatsa haukabyitsa ziknakaranaha. Pariseutsa atsabarẽtsa kino niwatihi haukabyitsa ziknakaranaha. Deus bo mopamykysokonaha. Iwatsahi kytsa Sesus bo zumukunaha. Ipe niaha:

— Suão Batista zinymyrykynahatsitsa tuk haukabyitsa ziknakaranaha. Pariseutsa kino niwatihi haukabyitsa ziknakaranaha. Ikia tuk zinymyrykynahatsa batu. Asaktsa tahadisa-hakanaha. Amy humo sa tahadisahakanaha — nikaranaha.

¹⁹ Sesus ispe niy:

— Zinymyrykynahatsa katuk hauk tsimykaranaha. Maku tasukzaze tatukytsa tuk tamyikaha maha tumy mytakuku. Hamyikaha maha. ²⁰ Isukzata moparakze asaktsa haukabyitsa mykaranaha. Iwaze utakta kazo bo myziksizoze zinymyrykynahatsa kino niwatihi haukabyitsa mykaranaha. Iwaze Deus bo mopamykysonaha — niy.

²¹ Iwaze panu soho nitsasoko. Tah:

— Ba aty tohi panu ezytyk ty zizyzykyha isuk ibyky myzutsuku iwa myzeka isuk mysykbaik. Panu ibykta tu ezytyk humo mymyibaik — Sesus niy.

²² — Batu aty tohi duabohotsa tsik ezytyk ty ba siraratsa hwyk ibykta bo ba zisusu. Iwa myzeka duabohotsa tsik ezytyk mynapytoze ibykta tsasuk mytok. Mopokobaik. Duabohotsa tsik tsasuk ibykta bo susu tsimyzeke pimyiibaik. Duabohotsa tsik ezytyk tsasuk ezytyk eze tu tsipisusu hỹ — Sesus niy.

Iwa Sesus nitsasoko taharere panu ezytyk wata, duabohotsa tsik ezytyk waha nikara.

Sesus Sudeutsa mybyrywy humo nisi-hyrinymyryky.

²³ Kyze mybyrywy eze Sesus tuk zinymyrykynahatsa tuk waratok buruk niukurunaha. Niukurunahaze zinymyrykynahatsa tirikotsa nisibykyknaha sihipyrytsa ty tsikyky tsikyky iwaze taharapaspyk tu nisiborokonaha. ²⁴ Iwaze Pariseutsa Sesus pe niaha:

— Iktsa tykta! Ikia tuk zinymyrykynahatsa tarabaja mykaranaha. Amo skaraba nawa mykaranaha. Okoroze mybyrywy eze katsaktsa batu tarabaja mysopyk. Ana kino tubabatu Moises harere papeu humo mybyrywy soho humo ninyhyrinymyryky — niaha.

²⁵⁻²⁶ Kyze Sesus Pariseutsa pe niy:

— Hawa taparakta Dawi niy batu sa ahahyrinymyry Papeu humo Dawi soho ziwataha. Taparakta Dawi itukytsa siaraparētsa tuze Deus wahoro bo nipupunahaze. (Taparakta Abiata inarokota Deus wahoro zubata taeze ziknapamykysokonahatsa tuk taparakta.) Dawi nitsukze atsikara ty ziknapamykysokonahatsa Deus bo ky zituha ziknapamykysokonahatsa Deus bo nyny niaha anatyhi wabehyryk niy. Zioko itukytsa niwatihi ziokoknaha. Moises harere tihi:

“Ana humo ka atsikara kytsa ba zioknaha. Ziknapamykysokonahatsitsa zuba zikziokoknaha” niy. Iwahatu Dawi ziokok. Itukytsa kino ziokoknaha. Ana papeu humo batu ahahyrinymyry ja niy.

²⁷⁻²⁸ Deus kytsa nisisukni. Batu mybyrywy humo nisisukni. Kytsa tahabyrykynaha ana humo hi tabyrywy nizukni. Utakta Deus zikpehata ahawata ikyzik. Anahumo hi uta kino my-

byrykywy zihitsa ikyzik nawazuruze tabyryky eze zipehaka my hỹ — niy.

3

Sesus maku itsyhyrype noikta zizororowy.

¹ Sesus itsyhyrype noikta zizozorowy. Kyze usta nawa zuruze tabyrykywyze Sesus Sudeutsa wahoro bozo niy. Anaeze estuba maku itsyhyrype noikta niy. ² Pariseutsa Sesus bo nikozotoktokonaha. Sesus nizokparakanaha iwatsahi iksaziu nikaranaha:

— O mybyrykywyze ja hawa pizororowy — mytsaty nikaranaha. Sesus soho iharerewabymybarakanaha. Sesus Moises harere bo batu yhỹ nizihikiknaha iwatsahi pykyhytu ibo iksaziu nikaranaha. ³ Sesus sisoho humo tsihyrinymyrēta. Hawa abaktsa mytsaty nikaranaha ana humo kino zinymyryky. Iwaze itsyhyrype noikta pe — Kyiktykta! Pany! Mytazahara eze riktoty — niy. Yhỹ niy.

⁴ Iwaze Pariseutsa pe niy:

— Hawa skaraba mybyrykywy eze ahasopyk. Mybyrykywy eze kytsa bo tsipisapybaka zeka iwaze Moises harere bo ka ja yhỹ tsimaha. Kytsa bo tsipimiwy zeka ja wasani tsimaha. Kytsa bo tsimytsumuēhĩ zeka ja wasani tsimaha. Maku tsipibeze zeka ja wasani tsimaha. Hawa sa mybyrywy eze ahasopyk — niy.

Kytsa siharerebyitsa wa niunaha. ⁵ Iwaze Sesus sihumo takyriki. Sioktsiokrētsa hi sihumo tisukat-sihikrēta. Itsyhyrype noikta humo batu simypokz-itsiu ana humo takyriki. Iwaze itsyhyrype noikta pe:

— Atsyhyrype ty kabo nynyty — niy. Maku tatsyhyrype ty nyny niy. Atsoko nizororohik.

⁶ Iwatsahi Pariseutsa tahakyrikinaha, niunaha. Eroses tuktsa izumubanaha. Niharapepehakanaha:

— Hawa skaraba Sesus tabezehik — nikaranaha.

Sesus ustsá kytsa sizubarêtsa nisizororowy.

⁷ Sesus tuk zinymyrykynahatsa tuk pihikzotsabyri Karireja inarokota zitsikzanaha. Kyze kytsa sizubarêtsa Sesus bo niaha. Karireja ezektsa, Sudeja ezektsa. ⁸ Serusarêhe ezektsa. Idumaja ezektsa, Sorodão buburu koiknyktsa, kytsa asahi Sidō bytykareze tutsa, Tiro bytykareze tutsa iwa myzubaha ezektsa Sesus bo zumukunaha. Tapara hawa Sesus nikara botu ziwabykynaha. Iwatsahi ibo zumukunaha. ⁹ Iwaze Sesus tuk zinymyrykynahatsa pe niy:

— Kytsa pokso tsaraha bo tsatahaktsa! Iwa zeka mynamyhirizabanaha — niy.

¹⁰ Tapara Sesus sizubarêtsa nisizorohikwy iwatsahi simyiziubyitsa Sesus bo nikaranahatsa paikpa niharape petutukunaha. ¹¹ Kytsa asahi hyrikosotsa sapybaratsa sibo ziknakaranaha tsa hi Sesus bo iktsa niahaze iokeryk tahaekaratsa humo puruk puruk niaha. Kazi nikaranaha:

— Ikiá hi Deus tse babata — nikaranaha.

¹² — Soso byitaha! Ana tyhi batu aty tohi bo tsimytsasonaha — Sesus niy. Iwa nisibetsakik.

Sesus tuk zinymyrykynahatsa nisiwatawyky.

¹³ Kyze Sesus hara bo nidoze kytsa nisiwatawyky. Mysiwatawynahatsa ibo

izumukunaha. ¹⁴⁻¹⁹ Tatuk zinymyrykynahatsa nisiwatawy. Ituk zinymyrykynahatsa.

Simaõ pe: — Ikiakta Peduru — niy. Tsiaku Suão Sebedeu hyrytsa ahatsaktsa. Asaktsa nisitsatsikik — Bijo bipyri hyrytsa — maha. Iwaze ãdere, Piripi, Baratoromeu, Mateus, Tome. Usta Tsiaku Arapeu tse, Tadeu, Simaõ tatyryktsa humo niwatoroko. Iwaze Sudas usta Iskariotses inarokota atahi Sesus isukyrytsitsa bo ziockyhyrykta iwatsa Sesus nisiwatawy.

Nisipeha:

— Nohi bo tsimynakozorenahaktsa! Myzubaha bo Deus wasania ty tytsasonahaktsa! Tysizororowynaha! Hyrikosotsa sapybaratsa tysiksiwyhik! — niy. Hyỹ niaha. Sesus nipamykyso, iwa niaha.

Sesus Beresebuhu soho humo nisihyrinymyryky.

²⁰ Iwaze Sesus wahoro bo zumuzo niy. Iwaze kytsa sizubarẽtsa ibo zumukunaha. Sipokso batu hauk, zinymyrykynahatsa niwatihi batu hauk.

²¹ Itukytsa isoho ziwabynahaze ibo zumunaha:

— O ikia wahoro bo tsipaoktyhyryknaha — niaha. Atakta ityrykmyita wata mytsaty ahabyitsa nikaranaha. ²² Iwaze Sudeu sopykwy iwatahatsitsa ibo zumunaha. Serusarẽhe ezektsa nitururuknaha. Sizubarẽtsa Sesus ziharerewabyky-naha. Asaktsa:

— Beresebuhu Sesus tuk mynapykyryk. Iwatahi hyrikosotsa sapybaratsa humo mysipeha, Satanas humo nisiksiwyhik — mybarapetu nikaranaha. Satanas usta inarokota Beresebuhu atakta hyrikosotsa sapybaratsa pehakatsa.

²³ Iwaze Sesus tabo nasipeha. Sudeu sopykwy iwatahatsitsa tabo nisihuahuaka. Isoho humo nisihyrinymyryky.

— Hawa sa Satanas atatu taiksiwyhik — niy.

²⁴ — Ityryktsa myharape ziubynahaze mopyknaha. Kytsa metutu mymyinaha zeka iwaze mysi-babaiknaha. ²⁵ Nawatihi estuba zubahatsa myharape ziubynaha zeka asa zuba mokmyinaha. ²⁶ Iwahatu Satanas tatuktsa tu myharape ziubyi zeka myokbabaik. Sisohometutu humo mopyk — niy.

²⁷ — Batu aty tohi ipaikta wahoro bo ba ziktsuk iwaze ba inamy ziakse. Ba ziky. Tapara amata ipaikta piakwaraze, iwahoro bo mytsuk inamy piakse.

²⁸⁻²⁹ Kaharere tsiwabytoktonaha. Kytsa simysapybyitsa nikaranaha Deus mysiokzohik. Siharere batu imysapy ana hi Deus piokzohik. Sisopyksapybyitsa mysiokzohik. Kytsa Deus hyrikoso soho pisapybyrikinahaze ana humo hi ba ziozkohik. Deus ana humo hi ba zikspiriktsokda. Ana isopyksapybyitsa ty tawahi kytsa tuk mynapykyryk — Sesus niy.

³⁰ Iwa ispe niy. Nezeba kytsa ipe niaha:

— Ihyrikoso sapybara ty ikia tuk mynapykyryk — niaha. Iwatahi ana humo kino nitsasoko.

Sesus je itukytsa niwatihi ibo izumunaha.

³¹ Kyze Sesus je itukytsa ahatsa ibo zumu tsihikiknaha. Kytsa humo batu ibo zukzuk. Ape baze niriktotohokonaha. Iwatsahi zipehkanaha.

³² Kytsa sizubarētsa Sesus okeryk nidyhydyhyknaha. Ipe niaha:

— Aje atukytsa ahatsa ape baze moriktotohokonaha. Atuk mopamykyso tsihikiknaha — niaha.

³³ Sesus ispe niy:

— Atatsa hi kaje. Asaktsa hi katukytsa — niy.

³⁴ Iwaze kytsa asaktsa harape baze nidyhydyhykynahatsa sibo iktsaziu niy. ³⁵ Ata hi:

— Asaktsa Deus harere bo hyŷ mykaranaha hawa Deus mozihikik sisopyk asa hi katukytsa babatsa. Asiza hi kaje babaza katukytsa babatsa niwatihi — Sesus niy.

4

Sesus nisiparikikta soho nisihyrinymyry.

¹ Iwaze zinymyrykynahatsa ibo ziksizonahaze Sesus pihik sak eze nisihyrinymyrykyzo. Myzubaha pihikzotsabyri eze niriktotohokonaha. Iwatahi myzubaha pokso tsaraha bo takorohyk. Tsaraha sak bete nidyhyky. Kytsa pihik sak eze iharere ziwabykynaha ² Nisihyrinymyryky. Waratok soho humo nitsasoko nawa humo nisiwatawyky. Hawa kytsa mekywatsa tu Deus harere bo maha, wastuhu iharere bo hyŷ maha, ustsahere bo batu yhyŷ maha ana humo hi nisihyrinymyryky. ³ Ata hi:

— Tsiwabytoktonahaktsa! Kyze maku waratok bo niy. Ata siriktsa nisiparikik. ⁴ Nisiparikikze wastuhu riktsa ske sak bo inatsukunaha. Iwaze piyktsa nisihorozukbaiknaha.

⁵ Kyze ustsahere riktsa nisiparikikze harahare buruk inatsukurunaha. Iwatsahi atsoko zipokona-haze wytyk tsikaeni zuba humo niakbabaiknaha, batu iytyk sapy. ⁶ Batu siharapyryky iwatsahi

niakbabaiknaha. Nitsehebaiknaha. Haramwe humo niakbabaiknaha.

⁷ Kyze ustsá riktsa nisiparikikze inikoso bo inatsukurunaha. Tahapykyknahaze nisiupyksiknaha. Inisahatsa humo, batu tahatypyk. Niakbabaiknaha.

⁸ Ustsaktsa mahani. Ustsá riktsa nisiparikikze jytykziuha bo inatsukurunahaze sisapyrëtsa. Tsiytyksapyrëna bo natsukunaha. Niahatsahi taypykyknahaze tahasuknaha nipopokonaha. Wastuhu nisiubaranaha tirïta riktsa. Ustsá nisiubaranaha sesëta riktsa. Ustsá nisiubaranaha sê riktsa sizubarëtsa hÿ — niy.

⁹ Iwaha soho humo nisihyrinymyryky:

— Kaharere tsiwabynaha zeka wabyziutahaktsa kytsa! — niy.

Hawa Sesus nisispirikpoko.

¹⁰ Kyze kytsa sizubarëtsa niparaknahaze zinymyrykynahatsa wastuhu wabynahatsa ahatsa ibo zumunaha ipe niaha:

— Hawa ha ty aharere ty riktsa soho tsimymywatawy — niaha.

¹¹ Sesus ispe niy:

— Deus kaharere ty pahahyrinymyry tsihikik Deus tyryktsa soho pahawatawy tsihikik. Ustsá batu wabyziu. Ikiahatsa kahyrinymyrywy ezytyk bo yhÿ tsimaha iwatsahi Deus tyryktsa tsi-moziknaha. Ustsá batu, iwatahi isoho humo nisihyrinymyryky. ¹² Isoho humo piwabynahaze hawa ha ty piwatawy batu mytsaty hÿ. Isoho humo mytsatykynaha zeka sisopykysapybyitsa ty

mykaranaha pimoewy tsihikiknaha. Sisopyk-sapybyi humo sisukatsihikrētsa tu zeka Deus mysiokzohik hỹ ana hi batu sihumo itsihik — niy.

Riktsa pariktsa soho humo nisispirikpoko.

¹³ — Kasoho humo ahahyrinymyry byizeka. Iwaze hawa usa soho humo sa mytsaty tsimykaranaha — niy.

¹⁴ — Kaharere pahawatawyky. Asaktsa kahyrinymyrywy ezytyk bo yhỹ maha zeka Deus tyryktsa moziknaha. Atakta nisiparikiktsa Deus harere mynatsasokonahaktsa watsa. Riktsa Deus harere hyrity watsa niy.

¹⁵ Wastuhu Deus harere ziwabynahatsa riktsa watsa ske sak bo inatsukurunaha. Deus wasania ty piwabynahaze Satanas sibo mozumuze, Deus harere piakse. Kytsa sispirikpobyitsa tu Satanas Deus harere ziaксе piyktsa hyrity watsa iwaze wasani humo batu sispirikpo.

¹⁶ Utsa Deus harere piwabykynaha. Asaktsa riktsa watsa harahare buruk inatsukurunaha wytyk tsikaeni zuba batu siharapyryky. Tapara wasaniha ziwabykynaha sakurētsa niyziknaha. Riktsa jakspe bete tu niapykyryknaha batu jytyksapy eze inatsukurunaha watsa. Asahi tsikaeni zuba pinymyrykynaha. ¹⁷ Ziwabyziubynahatsa tu Deus bo tsihokdaharēna zeka Deus harere bo batu yhỹ my nikaranaha, iharere humo ispirik-tsokdanaha. Utsa kytsa Deus harere humo nisimyjakanaha Deus wasaniha zimoewynaha. Deus humo batu sispirikpo.

¹⁸⁻¹⁹ Utsa Deus harere piwabykynaha. Asahi riktsa watsa inikoso bo inatsukurunaha iwatsahi niupyksikbaiknaha. Deus harere piwabynahaze

tahanamy bo zuba mytsaty mytsaty nikaranaha. Tahanamy tsihikiknaha zuba. Sinamy inisahara watsa iwatsahi siriktsa batu taypykwatsa, wihara batu nijakuk Deus harere humo sakubyri zumunahaze ihumo batu sispirikpo.

²⁰ Utsa Deus harere piwabykynaha hawaha mykaranaha riktsa watsa wytyk tisapyrēna bo inatsukurunahatsa, ustsā kytsa Deus harere siwaby nahatsa watsa piwabyziukunaha. Piwabykynaha iharere bo yh̄y mykaranaha ihumo sispirikporētsa moziknaha. Deus harere bo hȳy nikaranaha. Iwatsahi wihara nijakuk naha wa. Wastuhu nisiubaranaha tirīta riktsa. Ustsā nisiubaranaha sesētsa riktsa. Ustsā nisiubaranaha sē riktsa. Sizubarētsa h̄y — niy.

Deus tuktsa niwatihi iharere bo hȳy mykaranaha simysapyrētsa moziknaha wihara waha simysapyrētsa. Iwaze hawa kytsa Sesus hyrinymyrywy ezytyk hawa ja maha iwatahi nisihyrinymyryky.

Rika soho humo nisihyrinymyryky.

²¹ Kyze Sesus tuktsa zinymyrykynahatsa bo nipamykysokozo. Rika soho nitsasoko. Ata hi:

— Batu aty tohi pitsi rika ziknapok. Iwaze peryk pukezi zik niy. Batu aty tohi rika wanu pukezi zik niy. Pitsi rika jobaze zik my. Isapy eze tu my. Iwatsahi kytsa inapupunahaze amypubyri. ²² Aba hawa ha jokpitsīha bykyze kino piwatawy. Aba amy humo batu myhyrinymyry bykyze kino tanymyryky. ²³ Kaharere tsiwaby tsihikiknaha zeka wabyziutaha! — niy.

24 — O wabyziutahaktsa kytsa! Hawa uस्ता kytsa ahasopyk ana kino Deus ahabo isopyk. Ikiahatsa uस्ता kytsa mysisapywyky zeka Deus pahasapywyky. Ikiahatsa uस्ता bo tsimysisapybyrikinaha zeka ahasopyk, iwaze Deus kino niwatihi ahabo atsatu isopyk Deus ahahumo iakyri mozik.

25 Atakta pinymyry tsihikik pihyrinymyrytohi. Atakta kaharere bo batu wabytokto tsikaeni zuba pinymyry myspiriktsokdaka, Deus mymyspiriktsokda.

Siriktsa soho humo nisihyrinymyryky.

26 Sesus nipamykysokozo:

— Deus tyryktsa abazubatsa mozikze maku wata. Atakta tatsuhuk bo siriktsa nisiparikik.

27 Unata zurubakaze siriktsa mozipobanaha. Pibytuhukutu inapopoze siriktsa taypykbakanaha. Hawa siriktsa taypyknaha maku batu ihyrinymyry. 28 Ta zuba taypyknaha siriktsa mozipokonaha. Tapara ipa mozipo, iwaze ikoka motaypyk iwaze riktsa ikoka eze mynahareknaha. Sizubarētsa niubaranaha.

29 Kyze moakuknahaze niunaha maku penari ty mysizyzyknaha, nikymynahaze atsoko mysizyzyk nahỹ — niy. Iwa Sesus siriktsa soho humo nisihyrinymyry.

Mostarada riktsa soho humo nisihyrinymyryky.

30 Sesus nipamykysokozo. Deus tyryktsa abazubatsa humo nisihyrinymyryky:

— Hawa kytsa Deus tyryktsa sa. Hawa Deus tyryktsa mypehakatsa zahawatawyky. 31 Rik tsi-bik taypykze watsa. Rik mostarada wata niy.

Wytyk eze ziparikikze mostarada pyripykani rik-tsa. ³² Kyze rik taypykze hwi puëtsikybyita mozik, tisarapazubarëta mozik. Iwaze piyktsa ibete taha-sukuknaha isarapatsa watu mykaranaha — niy.

Iwa nipamykysoko Deus tyryktsa sizubarëtsa mozik. Taparaka batu sizuba aibani abazubatsa moziknaha. Hawa mostarada niubara iwatsa Deus tyryktsa mysiubaraka.

Taparaka iokpitsĩhatuk anasoho hi kytsa mysi-hyrinymyryky.

³³ Iwaze Sesus sisoho sizubarëtsa kytsa bo nipamykysoko. Iwa nisihyrinymyryky. Sibō nipamykysoko, zinymyrykynahaze iwaze kytsa nisihyrinymyrytohi. Isoho humo zuba nisihyrinymyryky. ³⁴ Bykyzehu atazubaze zinymyrykynahatsa tuk sisoho humo nisiwatawyziu ana hi nitsasoko. Iwa sisoho humo mytsatyziu nikaranaha.

Sesus zopoktsa nisipykwyhik.

³⁵ Kyze haramwe zunubakaze, Sesus zinymyrykynahatsa pe:

— Koikny tynaporenahaktsa kytsa! — niy.

Yhỹ niaha.

³⁶ Utsa nisiksiwyhiknahaze Sesus tsaraha eze nitareta, iwaze zinymyrykynahatsa zikorohyknaha. Nabo amykta taba zitsikzakanaha. Utsa tsarahatsa kino niwatihi nikurunaha. ³⁷ Iwaze atsoko zopoktsa inabybyknaha. Pihik ihiridawy waha niukuru tsaraha pihik ty inaharekek, ana humo hi asiba nitaboknaha. ³⁸ Sesus kino tsapukteze nihoeke. Zurubaka iharek panu bete

nihoeke iwatsahi tahapybyspyk tu zituzutuzukunaha. Zinymyrykynahatsa ity zipopohiknaha.

³⁹ Kytsa:

— O mypehakatsa batu iktsa ziky tsimymybabakanaha! — niaha.

Kyikrikto niyze:

— O zopoktsa aksobyitahaktsa! Niwazuba pihik pyktykta! — niy.

Zopoktsa atsoko paỹ niaha. Pihik atsoko nit-sikyrituhudibyri. ⁴⁰ Sesus ispe niy:

— Amy pokso ahapybyrëtsa “Sesus batu imypokzitsiuk” tsimykaranaha — niy.

⁴¹ Tahapybytuk tu nitsasokonaha:

— Atakta Sesus aty skaraba! Zopoktsa, pihik, ihumo ziwabykynaha. Aty skaraba Sesus! — nikaranaha. Batu sihyrinymyry. Sesus Deus tse, ihumo sihyrinymyrybyitsa.

5

Sesus maku hyrikosotsa sapybaratsa tukukta nisiksiwyhik.

¹⁻² Iwaze koiknyktsa taba bo Kerasa tyryktsa bo zukzuk niahaze. Sesus byuzo niyze, maku ibo izumu. Hyrikoso sapybara zikzibytuhukunaha tu ibo pororo ziknakaranaha. ³ Iwatahi siytyk baze nitareta. Atazuba zikzuruku. Mytyk ikny tahi ziknakara ana eze hi ziknapykyryk. Batu ipaiktaze kino zizukbatsi karikutsitsitsa humo kino ba ziknazukbatsikinaha ba itsipatsa ty pokzi zikaha ipyrytsa ty iwa ziknakaranaha kino batu karikutsitsitsa ziknasitsawakbakanaha ba aty tohi zipaik. ⁴ Karikutsitsitsa zipyrytsahãihiknahaze ziknasitsawakbaka sasabyitsaktsa batu sipaik

ipaikwy tysukni ahabyitsa. ⁵ Okoroze unata niwatihi kadi ziknakara. Hara joboni eze siytyk eze kino niwatihi ziknakuru. Haraharetsa humo taharekywyikik.

⁶⁻⁸ Iwaze ěrykani Sesus bo nikozoze ibo zumu. Taekaratsa humo iokeryk puruk puruk niy.

— O Sesus abazubata tsihyrinymyrĕta — nikara. (Sesus ihyrikoso sapybara ziny tahi zipaha:

— O hyrikoso sapybara nabo pãoty! — niy.) Maku hyrikoso sapybara tukta opykani kakaik niy:

— Amo Sesus Ikia hi Deus tse. Amo skaraba kabo tsikzumuku Deus zikwy humo awatu tykta! myhumo batu asopyksapyhukta — niy. ⁹ Sesus:

— Amo skaraba anaro — niy.

— O kanaro myzubaha katsa myzubarĕtsa hỹ — niy.

¹⁰ — O hyrikoso sapybara sapy bo ka isty pehapehabyity — maku nikara. ¹¹⁻¹² Pazaharezatsa sizubarĕtsa hara sukpe taba bo tahadisahanaha.

— Katsaktsa za pazaharezatsa tuk tsimypykyknaha — hyrikoso sapybara nikaranaha.

¹³ Sesus ispe niy:

— Pazaharezatsa bo tahaktsa — niy. Iwaze pazaharezatsa bo zumukunaha, asa hi iharat-supetohowy bo nitururukiknaha. Pihik bo niharazukzukbaiknaha sizubarĕtsa dois miutsa niakbabaiknaha. De.

¹⁴ Iwaze pazaharezatsa perytsitsa nitururukiknaha, nanabyitaba myzubaha bo nipamykysokonaha.

— Sesus hyrikoso sapybara nisiksiwyhik iwatsahi pazaharetsa niakbabaiknaha — nitsasokonaha. Iwatsahi kytsa Sesus bo inakozorenaha:

— O hawa skaraba — nikaranaha. ¹⁵ Ibo izumunaha, maku bo nikozonaha. Astatu. Taparaka hyrikoso sapybara pokso, dyhyhabyita tu, inaukuru zuba. Abaka Sesus baze modyhyky nikara. Taparaka batu isuku. Abaka tasukuk. Wasani mytsaty mykara nizororo. ¹⁶ Ibo nikozonahaze sipybyrëtsa. Pazaharezatsa perytsitsa: — Iwaha nitsasokonaha — niaha. ¹⁷ Hyrikoso sapybara soho ty nipamykysobanahaze, kytsa:

— O tsiksizokta, Sesus! Ikia pokso mypybyrëtsa — niaha. ¹⁸ Iwaze Sesus tsaraha bo takoroze izororota:

— O ikia hapik! — niy.

¹⁹ Sesus:

— O batu. Awahoro bo tsiksikta! Atukytsa pe tsimy “O, Deus kahumo tsimypokzitsiukrëta. Abaka ikzororo” tykta! — niy.

²⁰ Hyÿ niy. Ziksizo. Itukytsa Sesus soho ty nipamykysoko. Nanabyitaba hudikhudikwy mytsyhyrytsawa bo Sesus soho ty nipamykysoko.

— O abaka ikzororo. Sesus zikzororowy — nikara. Sizubarëtsa paikpa iktsa nikaranaha.

— Amo skaraba! — niaha.

Sesus imyitsapyritatsa zizororowy. Sairuste jypykyhyzytyktatsa zihyrizikpowy.

²¹ Kyze Sesus zinymyrykynahatsa tuk amykta tabakta iziksizonaha. Iwaze nimyrazata eze kytsa sizubarëtsa ibo izumukunaha. ²² Iwaze Sairu Sudeu wahoro taparaktsa Sesus bo izumu.

— Sesus abazubata — mytsaty nikara. Iwatahi taekaratsa humo puruk puruk nikara ²³ Niytahi:

— Pany Sesus! Tupakta kawahoro bo! Kaste pomozaka. Aidytykta! Ihumo paik tsimy zeka mozororo. Iwa zeka ba zikumuza — niy.

²⁴ Yhỹ niy. Sairu hapik niparak. Siapik sizubarẽtsa niukurunaha zihyrizabaiknaha.

Sesus imyitsapyritatsa zizororowy.

²⁵ Wytyk tihi siapik niukuru. Ispubyri ahabyitatsa ispu ba ziknapyk. Mytsyhyrytsa wa ziytyk tseheze imyitsapyritatsa ziknapykyryk.

²⁶ Atatsa myzororowytsa bo. Nanabyi zikzikuku zikino batu izororowyhuk iwatatsahi taokyrisaroko zepykba. Imyitsapyritatsa babatatsa.

²⁷⁻²⁸ Sesus soho kytsa nisizororowy ziwaby iwaze atatsa tasopyk:

— O ikza isuk humo paik my zeka mozororo — mytsaty nikara. Iwaze isukpetaba zuk. Kytsa papatu isuk tsihara humo paik niy. ²⁹ Atsoko ispu inapyk nizororo.

— O ikzororobaba — mytsaty nikara. ³⁰ Sesus zinymyry Deus zikwy zipo. Iwaze Sesus:

— Aty sa kasuk humo paik niy — niy.

³¹ Zinymyrykynahatsa:

— O ikiasta iwewehe baeze tsimypykyryknaha. Amo “Aty sa kasuk humo paik niy” tsiky — niaha.

³² Sesus paikpa iksa nikara aty sa kasuk humo paik niy atahi ziperyky. ³³ Iwaze atatsa izororotatsa ibo zumuzo. Tsipybyrẽtatsa nikara. Nitydydykyktatsa tu ibo zumu iokeryk taekaratsa humo

puruk puruk niy. Ihumo tispirikporētatsa. Ibo ta humo ky nitsasoko. ³⁴Sesus ipe niy:

— O katukywatatsa. “Sesus pikzororowy” tsiky. Ikia kazikwy humo aspirikpotatsawy azororowy. Akurētatsa tsiksi. Awahi tsikzororo baba — niy.

Sesus jypykyhyzytyktatsa niratatsa zihyryzikpowy.

³⁵Iwa nitsasokoze, kytsa sibo zumunaha. Kytsa Sairu wahoro ezektsa, sibo harape bo zumukunaha. Asahi:

— Aste botu nihyrikosokda Sairu. Kyzekta! Iwa zeka Sesus mytakni! — niaha.

³⁶Sesus ziwaby tahi Sairu pe niy:

— Apyby byihukta! Uta kabo zuba mytsaty tsimy zeka kahumo tsaspirikporēta. Tupakta! — niy. Iske buruk hyry hyry hyryzo niaha. ³⁷Iwaze Sesus tuk zinymyrykynahatsa harakykbyi zuba nisioktyhyryk Peduru, Tsiaku, itsy Suão, iwatsa zuba Sairu wahoro bo zumunaha. ³⁸Ata wahoro eze kytsa sizubarētsa Sairuste pokzi hawa tohi zikahabyispyk nipuziukunaha. ³⁹Sesus nitsukze ispe niy:

— Hawa hatsa sa tsimopuziukunaha Iste mahani isukmuza byitatsa tu purubakatu — niy.

⁴⁰Iwaze ana hi ziwabynahatsa hazi nikaranaha. Sesus humo sihyrinymyrybyitsa iwatsahi tsaeni bete tu nikaranaha. Sesus ispe niy:

— Ape bo tsiponahaktsa! — niy, ape bo kytsa zipoiknaha. Iwaze Sesus tatuktsa, Sairu, Sairu oke, iwa jypykyhyzytyktatsa bo izumunaha.

⁴¹ Sesus jypykyhyzytyktatsa bo izumuze itsyhyrype humo paik niy. Ipe:

— *Tarita kumi* — niy. Siharere piwatawy. — Jypykyhyzytyktatsa pe kyiktyktsa! — niy.

⁴²⁻⁴³ Atsoko nahyrizikpo, natarikto, zitabaka iwaze nipybybaiknaha. Atatsa dose mytsyhyrytsa wa ziytyk tsehetatsa. Sesus kytsa pe:

— Ahakso byitaha. Atatsa idisahawy ty ibo nynyntaha! — niy. Idisahawy ty ibo nyny niaha. Iwa hỹ.

6

Nasare ezektsa Sesus harere bo batu yhỹ nikaranaha.

¹ Kyze Sesus ziksizo. Nasare eze itaypykyk zinymyrykynahatsa tuk zumu. ² Nawa zuruze tabyrywy eze Sudeutsa wahoro bo zumubanaha. Anaeze kytsa nisihyrinymyrykyze sipybyrẽtsa nikaranaha. Ihyrinymyrywy ziwabynahaze nipybybaiknaha. Asa hi:

— Atakta hawa sa zinymyryky. Hawa myhyrinymyrywy baba sa. Aty sa zispirikpoko. Amy ty kytsa batu zikaha ana ty hi mykara, aty sa zikwy ituk mynapykyryk. ³ Atahi ja hwitsabikitsa Maria tse. Tsiaku Sose Sudas Simaõ iwatsa moziky ipe sisopyk. Iwa itukytsa maha. Itukykyry mytuk tu niwatihi maha — nikaranaha.

Iwaze iharere bo batu yhỹ nikaranaha. ⁴ Iwaze Sesus ispe niy:

— Nanabyitaba Deus sohokotsa harere kytsa piwabytoktokonaha. Atahi tahudikhudikwy eze tu zeka iututsa pauktsitsa batu iharere ziwabynaha — niy.

⁵ Kytsa Sesus humo sispirikpoziubyitsa zikwy batu iwatawyhy. Atahi batu sizuba simyitsapyritsa nisizororowy tatsyhyrypetsa ty sibete tsika nikaraze nisizororowy. ⁶ Ihumo sispirikpobyitsa tu ana humo hi paikpa mytsaty nikara.

Sesus dose zinymyrykynahatsa nisipeha.

Iwaze ustsá myzubahatsa bo niukuru, anabo kytsa nisihyrinymyryky. ⁷ Kyze Sesus tuk zinymyrykynahatsa nisipehaka. Iwaze tazikwy ty sibó nyny niy. Iwatsahi kytsa asahi hyrikosotsa sapybaratsa sibó pororo ziknakaranaha nisiksiwyhiknaha. Sesus zikwy humo hi hyrikosotsa sapybaratsa ziknasiksiwyhiknaha. Nanabyitaba nisipehaka. Sipetok kohotsa ty zuba iwa nisipeha. ⁸ Ispe niy:

— Ahazozowy ty zuba wabehyryk taha. Ęryka bo tsipomonahaze ahaborohobyitsa tutaha! Ahadisahawy byitsa tutaha! Okyrysaro ty kino pok pok byitaha! ⁹ Ahapyrysuktsa ty zuba korobyktaha! Usa ahasuk tyka pok pok byitaha! Estuba zuba tsimaha. Batu petok suk pok pok byitaha — niy.

¹⁰ — Hudikhudikwy tsimyzumunaha. Wahoro bo tsimypupunaha zeka anaeze hi tsimypykyryknaha. Asta wahoro eze tu zuba tynapykyryknaha. ¹¹ Tsipomonahaze tsarytsitsa ahape pany pakuty ahabyi zeka. Asaktsa ahaharere ty waby ahabyizeka meky botu tsimaha. Tsimykurunahaze ahapyrysuktsa ty bokbokyk taha. Wytyk tazy ty mynatõ. Mynatõ zeka sihudikhudikwy

ezeakta Deus harere bo batu yhȳ niaha iwatawy — niy. Iwa Deus mysisininiwyky anahi piwatawyky.

¹² Iwatsahi zinymyrykynahatsa Deus wasaniha sizubarētsa bo motsasokonaha. Asaktsa:

— Ahasopyksapybyitsa ty tsikykaranaha tsi-moewynahaktsa kytsa — nikaranaha.

¹³ Kytsa asahi hyrikosotsa sapybaratsa sibo pororo ziknakaranaha nisisiksiwykynaha. Simy-itsapyritsa siharek bete ituta hyrity waha ty zik-nasiharasusunahaze ziknasizororowykynaha.

Suão Batista bezewy.

¹⁴ Kyze sihudikhudikwy pehakatsa myhyrizik-wanitsa Erodes inarokota atahi Sesus soho ziwaby. Kytsa sizubarētsa Sesus soho ziwabykynaha. Asa zuba nipamykysokonaha:

— O atakta Suão Batista inahyrizikpo iwatahi amy ty kytsa zikahabara ty ana ty hi mykara.

¹⁵ Utsa batu:

— O atakta Erias taparakta mydiri — nikaranaha.

— O batu, taparakta Deus sohotsa ziknakaranaha — ustsawastuhutsa nikaranaha.

¹⁶ Erodes ana ziwabykyze:

— O ata hi ja Suão Batista iky. Uta kino kytsa pe Suão Batista soik buruk hi bokokik iky. Atahi ja inahyrizikpo — niy.

¹⁷ Tapara Erodes pehakata kytsa Suão bo nisipehahik. Asahi itsipa humo sakyriukrēnikitsa hurukwy bo zioқтыhyryknaha. Ana eze karikutsitsiwytsa ty zipawarakanaha. Iwa hȳ. Ana kino isopyk Erodias humo. Tatsa itsy Piripi oke iwatuze atatsa tuk ziakse niy. ¹⁸ Tapara Suão tih:

— Ikia Deus harere bo batu yhỹ tsimy. Deus harere tihi “Atsy oke ba ziaксе.” Ikia atsy oke tsiakse iwatahi Deus harere bo yhỹ ahabyitahi tsiky — ziknakara.

¹⁹ Ana humo hi Erodias tsiakyriukarētatsa, iwatatsahi Suão zibezekyzyky Eroses ipokso hi batu zik, atahi ihumo tsipybyrēta. ²⁰ Eroses Suão soho humo tsihyrinymyrēta. Atahi tsimysapyrēta ana humo hi tsihyrinymyrēta. Iwatahi ihumo tsimyarerewabyrēta. Iharere humo ziwabyze paikpa mytsaty nikara. Iharere ziwaby tsihikik ziknakara:

— Atakta sakyriukrēnikitsa hurukwy eze ka kytsa ba zibezenaha, iwahi piperyky — mytsaty nikara.

²¹ Kyze Eroses myikaha zumuze. Tумы tsihohokrēna inakymyze iwa Eroses purukwy zumuze imyikaha bo mytsaty nikaranaha. Sizubarētsa sakzohotsa bo huahua niy. — Kamyikaha bo tyzumunaha — nikaranaha. Kytsa myhyrizikwanitsitsa sodadutsa pehakatsa, Karireja hudikhudikwy ezektsa asaktsa simyhyrizikwanikitsa iwatsa kytsa sizubarētsa imyikaha bo izumunaha. Iwaze Eroses oke Erodias inarokotatsa ana hi ziperyky iwaze hi Suão zibeze tsihikik. Naha atatsa tape aba ikza Suão pibezewyky. ²² Kyze Erodias ste jypykyhyzytyktatsa tsarawybara bo tu netsuk. Atatsa hi Eroses ykzohotsa okze nikariki. Tisapyrēna ty nikariki iwatatsa hi kytsa sakurētsa nikaranaha. Iwaze Eroses ipe niy:

— Amy sa tsimyzihikik. Amy ty kabo tsimyza-pyky zeka anatyhi abo nyny my.

²³ Deus kaharere piwaby iwatahi atsatu mykara. Amy kabo tsimyzapyky zeka ana ty hi abo nyny my. Kahudikhudikwy bo tsimyzapyky zeka tsapukte buruk abo nyny my — niy.

²⁴ Iwaze atatsa zoihik. Taje pe niy:

— O kaje amy sa ibo myzapyky — niy. — Suão Batista harek tsimyzapyky hỹ — ije niy.

²⁵ Iwaze aidy atatsa ziksizo. Erodes pe niy:

— Suão Batista harek ty kabo nyny tsimy hỹ. Aidy iharek ty mypewy eze korok tsimy iwaze kabo tyny — niy.

²⁶ Sipehakatsa Erodes zisukatsihikbaik. Suão Batista soho ziwabyze tisukatsihikarêta nikara. Taharere ty ka sakzohotsa bo batu yhỹ niy, ana humo hi batu tyso. Tisikpybyrêta. Iwaze sodadu pe niy.

²⁷ — Suão Batista harek ty bokokiktykta. Isoik buruk bokokyk ty — niy. Sodadu niparak. Sakyriukrênikitsa hurukwy bo netsuk. Anaeze Suão soik ty bokokik niy. ²⁸ Iwaze iharek ty mypewy eze niy. Erodias ste bo zibykyryk. Atatsa taje bo iharek ty nyny niy. Iwa Erodes Suão Batista zibeze. Erodias iharek bo iktsa niyze Suão zibeze tsihyrinymyrêtatsa.

²⁹ Suão Batista tuk zinymyrykynahatsa ana soho ziwabynahaze izumukunaha. Inury ty zizozikarenaha. Harahare yktaba nitsahoroknaha de.

Sesus kytsa sizubarêtsa nisidisahawky.

³⁰ Kyze siakzohotsa Sesus bo ziksizonaha. Amy ty nisihyrynymyrykynaha ibo nipamykysobaiknaha. ³¹ Kytsa sizubarêtsa paikpa myzukurunaha

zinymyrykynahatsa Sesus ahatsa bo zumukunaha. Iwatsahi sibirybyitsa tu nikaranaha sidisahabyitsa tu. Iwaze Sesus zinymyrykynahatsa pe niy:

— Nabokta jerukbara bo tsimymybyrynaha! — niy.

Yhỹ niaha.

³² Iwaze zinymyrykynahatsa ituk jerukbara bo tsaraha eze kokokorohyk niaha. ³³ Utsa kytsa zuba nisinyaha. Asaktsa:

— O Sesus tuk zinymyrykynahatsa nabo moku-runaha. Tsimytururuknahaktsa! Hara taba siharaze nabo tsipomonahaktsa! — niaha. Kytsa sizubarẽtsa niukurunaha.

³⁴ Iwaze Sesus anabo byuzo niyze kytsa sizubarẽtsa bo iktsa niy. Sihumo tsimypokzitsiarẽta, sispirikpobyitsa tu sihumo tsimypokzitsiukrẽta:

— O Deus soho piwaby tsihikiknaha iwatsahi kaharaze nitururuknaha — niy. Iwaze Sesus nisi-hyrinymyryky iwaze kytsa ziwabytoktonaha.

³⁵ Zunubakaze zinymyrykynahatsa ibo zumunaha:

— O Sesus tykara eze ka batu mydisahawyky. Abaka punubaka hỹ. ³⁶ Kytsa hudikhudikwytsa bo tysipehakta! “Ahadisahawy tyzeskyknahaktsa” tsimy — niaha. ³⁷ Sesus:

— O ikiahatsa sidisahawy ty sibo nynytahaktsa! tsimaha — niy.

— Hawa skaraba atsikara ty huak tsimaha batu okyrysarotsa dusẽtos namy parata hi batu ziakse. Batu amy tohi ty zikaha — niaha.

³⁸ Sesus:

— Hana wa skaraba mydisahawy iktsatahakt-
tsa! — niy. Kytsa iktsa niahaze:

— O atsikara mytsyhyry wa zuba. Piknutsa
petok zuba — niaha.

³⁹ Iwaze kytsa sizubarētsa pe tsimaha:

— Tyk humo dyhy dyhytaha! Parakbaha dyhy
dyhytaha! — Sesus niy. Sīkuētatsa, sētsa iwa
nidyhydyhykynaha. ⁴⁰ Towahaditsa sikakairētsa
bete itahadyhydyhynaha. Parakbaha sē, sīkuēta
iwatsa sibete nidyhydyhykynaha. ⁴¹ Iwaze Sesus
atsikara ty okok niyze, piknutsa ty iwa nasekyk-
zoze bijo bo iktsa niy. Deus pe nikara:

— Ikiakta tsamysapyrēta ikia humo
ka mykurētsa — niy. Atsikara zitsakze
zinymyrykynahatsa bo nyny niy:

— O sibo tsipibiaknaha piknutsa petok tsi-
bik zuba tsatu niwatihi sibo nyny tahaktsa! —
niy. ⁴² Sibo nyny nyny nynyzo niy. Sesus
ziubarawy iwatsahi kytsa sizubarētsa tahadisa-
hakanaha. Sibo zibiakakzoze iwaze nitare tu.
Bykyze:

— O mysorokrētsa — nikaranaha.

⁴³⁻⁴⁴ Tahadisahabanahaze atsikara piknutsa
ahatsa nitare nahatsa peryktsa bo zipupukunaha.
Mytsyhyrytsa ty pỹ ahatsawa nasiharekbanaha.
Kytsa sizubarētsa sīko miutsa tahadisahanaha.
Siokeza, tahahyrytsa tuk niwatihi tahadisa-
hakanaha.

Sesus pihik tsiksukpe buruk niukuru.

⁴⁵ Atsoko Sesus tuk zinymyrykynahatsa Bete-
saida bo nisipeha. Ispe niy:

— Tsaraha eze kokokorohyktaha! Kaharaze pihikzotsabyri koikny tsitsikzanahaktsa! kytsa! — niy. Iwaze Sesus myzubaha siwahoro bo nisipehaka. Nisipehakaze zinymyrykynahatsa koikny ziturikinaha. ⁴⁶ Myzubaha ziksibanahaze, Sesus hara bo nido. Anaeze Deus bo nipamykysoko. ⁴⁷ Zunubaze Sesus atazuba hara bo nido. Zinymyrykynahatsa pihik tsikpukteze buruk ziturikinaha.

⁴⁸ Sesus sibo nikozo. Opykani ziturikinaha. Zopoktsa pokso opykani ziturikinaha, iwatsahi ispara izumu. Zokorobyitu sibo niy. Miwa botu kytsa bo pihik tsiksukpe buruk inaukuru harazuk ahabyita pitabaka. Asiba nisiharamu.

⁴⁹⁻⁵⁰ Sesus bo nikozonahaze pihik tsiksukpe buruk niukuru sipybyrëtsa nikaranaha. Tahapybyspyk tu kakaik niaha. Ihyrikoso zuba mytsaty ahabyitsa. Ipokso sipybyrëtsa. Iwaze atahi:

— O ahapunihikuktsa kytsa! Ahapyby byihu ja! Uta hi mykara — Sesus niy.

⁵¹ Iwaze Sesus tsaraha bo natakoro. Atsoko zopoktsa inapyknaha niukurunaha. Iwatsahi paikpa mytsaty nikaranaha. ⁵² Sesus Deus tse babata humo batu sihyrinymyry. Amy humo kytsa sizubarëtsa disahawyky ty ziubarawy ana humo hi nisiwatawy zinymyrykynahatsa ihumo batu sispirikpo. Sioktsiokrëtsa iwatsahi batu siaku. Bykyze zuba Sesus humo sispirikporëtsa moziknaha.

Kenaserete bo simyitsapyritsa nisizororowy.

⁵³ Pihikzotsabyri zitsikzanahaze Kenasere bo zumunaha. Ipuwuy bo nimyra byu niaha.

⁵⁴ Tsaraha ikny nizoknahaze kytsa Sesus ziny-naha. ⁵⁵ Iwatsahi siwahoro taba paikpa zikzumukunaha. Simyitsapyritsa Sesus bo nisioktyhyryknaha. Asaktsa tahawanu eze tu ibo nisioktyhyknaha. Nanabyitaba niukuruze.

⁵⁶ Kytsa hi:

— O Sesus mybo mozumuku — niaha. Ana zikziwabykynahaze simyitsapyritsa Sesus bo ziknasioktykyryknaha. Tsarawybara eze simyitsapyritsa iokeryk ziknasihoekeknaha. Situkytsa Sesus pe niaha:

— O asuk tsihara humo paik tsimaha zeka mykurẽtsa — nikaranaha.

Yhỹ niy.

Iwaze asaktsa Sesus suk tsihara humo paik maha zeka mozororobaiknaha. Nanabyi Sesus zikwy humo simyitsapyritsa sizubarẽtsa nizororobaiknaha.

7

Sesus Sudeutsa sopykwy humo nisihyrinymyry.

¹ Kyze Pariseutsa iwatahatsitsa kino niwatihi asaktsa Serusarẽhe ezektsa inakypyknaha. Sesus bo izumubanaha. ² Taparaktsa sopykwy ty nisihyrinymyrykynaha. Tapara tahatsyhyrype pikiknaha iwaze tahadisahanaha. Taha ty tsyhyrype pik byizeka ba ziktahadisahanaha.

³ Pariseutsa Sudeutsa ahatsa tahatytsyhyrype pik byizeka ba ziktahadisahanaha, sizotsa iwa nisihyrinymyrykynaha. ⁴ Hawa ha ty sidisahawy zozokorowy ikny zibykyknahaze nitsapikiknaha tsizubarẽna iwaze zuba tahadisahanaha. Iwa taparaktsa sopykwy humo nikaranaha.

Deus okze ka mysapyrētsa mytsaty ahabyitsa nikaranaha. Taparaktsa sopykwy humo yhỹ byizeka Deus ispe:

— Ikiahatsa batu ahamysapy — mytsaty ahabyitsa ziknakaranaha. Sipowysuktsa ty morosuk ty karikuktsa ty iwahatsa ty mysiokepiknaha taparaktsa sidiritsa sopykwy humo.

⁵ Sesus tuk zinymyrykynahatsa tahadisahanahaze ba ziktahatsyhyrype piknaha. Taha ty tsyhyrype pikbyritsa tu tahadisahakanaha. Taparaktsa sopykwy humo yhỹhabyitsa nikaranaha. Iwaze Pariseutsa Moises harere watahatsitsa niwatihi ana bo kino iktsa nikaranahaze ipe niaha:

— Amy humo zinymyrykynahatsa taparaktsa mydiritsa sopykwy yhỹhabyitsa nikaranaha. Amy skaraba sitsyhyrytsape pikihihbyitsa tu tahadisahanahana — niaha.

⁶ Iwaze Sesus ispe niy:

— Tubabatu Deus ahasoho ziwatahaka. Ikiahatsa zihawatahakanahatsa watsa kytsa bo tysimiwykynaha. Isaijas Deus sohokotsa tihi:

“Asaktsa katsa Deus humo mymypokzitsirētsa mybarapetu mykaranaha.

Ihumo batu simypokzitsi, iwatsahi nisispihikbatakanahatsa.”

⁷ “O Deus ikia zuba wasani tsimykara” nikaranaha

kaharere bo batu ma nikaranaha. Sispihikbatakatsa tu

“O katsa Deus harere ahabo tsimytsasokonaha” mybarapetu nikaranaha.

Tahaharere ty zuba motsasokonaha.

Tubabatu Isaijas Deus sohokotsa iwa sisoho ziwatahaka — Sesus niy.

⁸ Deus harere bo batu ma zikaha. Iharere batu ahawabyhy. Ahazotsa sopykwy ty zuba tsimykaranaha.

⁹ Deus harere bo batu yhỹ. Katsa mysapyrẽtsa mytsaty ahabyitsa tsimykaranaha, ahasopyk zuba tsimyzihihiknaha. Batu ahape tu tsipimyikiknaha.

¹⁰ Tubabatu Moises ziknakara:

— Ahazotsa tysipokzitsinahaktsa! Ahazotsa, ahajeza kino niwatihi wasani ahasopyk. Aty tazo pisapybyriki zeka tsibezehik. Aty taje pisapybyriki zeka tsibezekta — niy. Iwa tubabatu Moises ziwataha ahazotsa soho. Ikiyahatsa hi iharere bo batu yhỹ zikaha. ¹¹ Ikiyahatsa hi:

— O kazo kaokyrysaro ty abo nyny mykara eze tu batu zik. Anaokyrysaro ty Deus bo nyny my iwaze ba zatsumuẽhĩ — tsimaha. ¹² Anahi kytsa bo tsimytsasonaha zeka tsimyikiknaha. Kytsa tahanamy ty tahazotsa bo nyny maha wasani maha. Aha humo batu nyny maha. Iwaze ikiahatsa kytsa tysimyiwykynaha.

¹³ Ikiyahatsa Deus harere bo batu ahamyzihihik. Ahaharere ty zuba tsimykaranaha. Iwaze Deus harere humo batu ahakparawy. Iharere humo tsipimyikiknaha. Sesus Pariseutsa pe niy.

Kytsa simysapybyitsa moziknaha.

¹⁴ Kyze Sesus kytsa sizubarẽtsa pe niyzo:

— Kabo tyzumunahaktsa kytsa. Kaharere bo wabytaha! Tsiwabytoktonahaktsa! — niy. ¹⁵ — Amy ty maku hauk my zeka ba ana humo hi isopyksapybyita nikara. Hawa kytsa mytsaty mykara

ana humo hi batu imysapy mozik. Hawa mot-sasoko ana humo hi batu imysapy mozik hawa mynakara ana kino batu imysapybara mozik.

¹⁶ Kaharere tsiptiwaby tsihikiknaha zeka waby-toktotahaktsa! — niy.

¹⁷ Iwaze Sesus myzubaha ikny niparak. Zinymyrykynahatsa tuk iwahoro bo zumunaha. Inapupunahaze ipe niaha:

— Amy ty asoho ty tsimymywatawyky, amy ty tsimymyhyrinymyryky — niaha. ¹⁸⁻¹⁹ Sesus:

— Ikiahatsa ja niwatihi ikiahatsa sizubarētsa watsa, batu wabyziuha tsimaha. Kytsa tahadis-ahakanahaze wasani mykaranaha. Ana humo hi sakurētsa moziknaha. Sidisahawy siwazik eze zuba. Iwaze pikaranahaze hana bo ja — niy.

Iwa Sesus nisihyrinymyryky nanabyi mydisahawy wasani my, kytsa bo mektsatu disahawy watsa ty wasani my.

²⁰ Sesus nitsasokozo:

— Mydisahawy tisapyrēna my. Hawa ty kytsa mytsaty mykaranaha ana humo hi batu imysapy my.

²¹ Kytsa wytykyryk ahaza niwatihi hawa sa batu simysapy mytsaty mykaranaha zeka sisopyksapy-byitsa tu mykaranaha anahi batu imysapy. Iwaze kytsa ustsaktsa pimiywy tsihikiknaha. Mekta oke tu piakse tsihikiknaha. Mektatsa barikta tu mozihikiknaha zeka. Kytsa mysiba tsihikiknaha. Kytsa namy piakse tsihikiknaha. ²² Mekta oke bo ihizikikwy. Siharerewabymybarētsa. Simyspihik-batanikitsa. Sisopyksapybyitsa tu mykaranaha anahi zimiywynaha. Sizokdirētsa. Utsa mysimiywykynaha. Sisakimiyjarētsa tu, “O katsa zuba

mysapyrētsa” mybarapetu mykaranaha. ²³ Iwa kytsa mytsaty mykaranaha zeka iwaze batu imysapy moziknaha. Ana kino batu imysapy my. Mydisahawy zuba tisapyrēna my — Sesus niy.

Sudeubyitatsa tu Sesus humo tispirikporētatsa.

²⁴ Kyze Sesus niparak. Tiro bo bytykareze tu anabo niukuru. Anaeze wahoro bo nitsuk. Nitare tykareze. Kytsa batu ityny anaezehe nitarespyk. Batu kytsa ityny.

²⁵ Iwaze wytyk Sesus wahoro eze ziwaby. Ana ziwabyze atsoko wahoro bo niparak. Atatsa ste bo hyrikoso sapybara ibo pororo ziknakara. Iwatatsahi aste tsyhyryze Sesus bo niy. Zumuze iokeryk taekaratsa humo puruk puruk niy, ihumo tispirikporētatsa nikara iwaze iokeryk taekaratsa humo puruk puruk niy. ²⁶ Atatsa Sudeubyitatsa tu Kereko harere nitsasoko. Siropenisia ezektatsa niy. Iwaze atatsa hi Sesus pe niy:

— O hyrikoso sapybara ty kaste bo pororo mynakara tsiksiwyhik ky! Nabo pāoty tsimy — niy.

²⁷ Sesus ipe niy:

— Batu. Ikia Sudeubyitatsa tapara kahyrytsa Sudeutsa mysitsumuēhī. Bykyze zuba Sudeutsabyitsa mysitsumuēhī. Tapara ahahyrytsa zitadisahanaha bykyze zuba kytsa sidisahawy tsihirik ty tsikuparinitza bo nyny mynakaranaha. Tapara tsikuparinitza bo ahadisahawy ty nyny tsimaha zeka batu isapy tsimaha. Isopyksapybyitsa. Ihyrytsa tapara tadisahanaha — niy.

²⁸ Atatsa ipe niy:

— O myhyrinymyrykytsa wasape tsiky. Tsikuparinitsa zipyryktsa hwi upukezi tu asaktsa itsatsakyhy arehe ty tahadisahakanaha. Itsatsakyha ty tsikuparinitsa tahadisahakanaha. Ikza kino niwatihi piperyky tsipiktsumuēhī tsikuparinitsa zipyryktsa hwi upukezi watsa — niy.

²⁹ — O aharere wasani my niy. Ana harere humo kino awahoro boktsa! Hyrikoso sapybara ty aste ekze botu iksiksiwy — niy.

³⁰ Iwaze atatsa tawahoro bo ziksi. Nitsukze iste wanu eze nihoeke. Hyrikoso sapybara botu nisiksiwy tsakurētatsa niyzik.

Sesus zikwy humo iharawita ziwaby.

³¹ Kyze Sesus Tiro ikny niparakze. Sidō bo nio kyze Dekaporis ziharamu Karireja pihikzotsabyri bo niy. ³² Iwaze kytsa iharawita Sesus bo zioқтыhyryknaha. Ana humo kino iharerebyita. Kytsa Sesus bo zioқтыhyryknaha ipe niaha:

— O atsyhyrype ty iharawita harek bete tsikatykta! Iwaze tsipizororowyky — nikaranaha.

³³ Iwaze Sesus iharawita zioқтыhyryk. Sizubarētsa ikny ituk zuba niy. Iwaze Sesus maku ispiuke bo tatsyhyry ty korok niy. Hezok niy. Tasaytsik ty iharawita stiārik bete tsika niy. ³⁴ Iwaze bijoik pe bo iktsa niyze sysy nikara. Ipe niy:

— *Epapata* — iharere nitsasoko. Ana harere ziwatawy — Aspiukitsa saparetaha — niy.

³⁵ Iwaze ispiukitsa sapare niaha. Ziwabyky istiārik zizororobaba tsihareresapyrēta niyzik.

³⁶ Asaktsa ibo iktsa niahaze ispe niy:

— Ana kino kytsa sizubarētsa bo batu tyso — niy. Iharere bo batu ma zikaha. Zik-napamykysokonaha hawa iharawita zizororowy naha nanabyitaba ana soho ziknatsasokonaha.

³⁷ Paikpa iktsa nikaranaha. Asa hi:

— Amy skaraba nikara tisapyrēna my — nikaranaha. — Atakta iharawita tu abaka piwabyky. Ata iharerebyita tu abaka taharere piziuku. Hawa skaraba my — nikaranaha.

8

Sesus sizubarētsa nisidisahawyky.

¹ Kyze myzubaha Sesus tuk inakypyzkonaha. Batu sidisahawyky iwatsahi siarapa izumu.

² Iwaze Sesus zinymyrykynahatsa pe niy:

— Pany pāotynaha! Uta kytsa abazubatsa humo kamypokzitsiarēta. Harakykbyihi katuk zurunaha aba sidisahawy nepykba. ³ Ispe: “Awa-horo bo tsiksinahaktsa!” my zeka ske buruk taharapatsapyrispyk pumuzanaha, mektsaktsa ēryktsa tu izumukunaha — niy.

⁴ Zinymyrykynahatsa:

— Hawa skaraba tsimaha. Batu aty tohi mydisahawy ty kytsa bo nyny zeky. Jerukbara bo batu mydisahawyky. Katsaktsa ba ziksitsumuēhīnaha — niaha.

⁵ Sesus:

— Atsikara ja hana wa skaraba atsikara — niy.

— Yhỹ. Nawa usta tsyhyrype wa humo petok ziakyri sete atsikara tsimaha — niaha.

⁶ Iwaze Sesus kytsa sizubarētsa pe niy:

— Wytyk humo dyhy dyhy taha! — niy. Iwaze Sesus atsikara ty okok niyze Deus pe niy:

— Ikia tsamysapyrēta ahumo ka mykurētsa — niy. Atsikara zitsaktsakze tatuktsa bo nyny niy:

— O sibo nynytaha! — niy. Iwaze zinymyrykynahatsa sizubarētsa bo atsikara kytsa bo zibiakaknaha. ⁷ Piknutsa batu sizuba niwatihi niaha. Sesus Deus pe niyzo:

— O kazo ikia zuba tsamysapyrēta. Piknutsa zipyryktsa ty mybo nynytykta — niy. Iwaze zinymyrykynahatsa pe niy:

— O sizubarētsa bo piknutsa zipyryktsa ty nynytaha — niy.

Yhỹ niaha. Iwa kytsa sizubarētsa bo piknupyryktsa nisibiakaknaha. Kytsa sizubarētsa bo nyny nyny nyanikaranaha. Nisiubarawy.

⁸ Kyze kytsa sizubarētsa:

— O mysorokrētsa — nikananaha. Tahadisahabanahaze zinymyrykynahatsa atsikara piknutsa ty itsatsakyhy arehe ty peryktsa bo zipupukurunaha. Pok pok pok nikananaha. Iwa sete peryktsa inasiharekbanaha. ⁹ Kytsa sizubarētsa tahadisahanaha. Kwatero miutsa ahatsa. Iwaze Sesus nisipeha:

— Ahawahoro bo tsiksinahaktsa! — niy.

Yhỹ niaha.

¹⁰ Iwaze Sesus tsaraha bo itakorohyk. Zinymyrykynahatsa tuk kokorohyk. Daramanuta bo niaha.

Pariseutsa Sesus pe — Amy ty kytsa batu zikaha tymywatawy — niaha.

¹¹ Iwaze Pariseutsa Sesus bo izumunahaze niharapebetsakaknaha iwaze ipe niaha:

— Deus zikwy mybo tsiwatawykta. Atakta bijoikpe iknykta zikwy iwatawy humo tsiny tsihikiknaha iwatsahi Deus zapeha tsinymyryknaha — niaha. Iwa ziazkobyrikinaha. ¹² Sesus sihumo tisukatsihikrēta. Ihumo batu sispirikpo ana humo hi tisukatsihikrēta. Ispe niy:

— Amy humo abaktsa kytsa iwatawywy myziberikinaha. Amy humo utakta Deus zikwy mysiwatawy mozihikiknaha. Kaharere wasape batu amy tohi abaktsa kytsa bo mysiwatawy — Sesus niy.

¹³ Iwaze Sesus niparak. Tsaraha bo takoroza. Zinymyrykynahatsa tuk pihikzotsabyri koikny nipo. Pariseutsa asa zuba pihikzotsabyri sak niriktotohokonaha.

Pariseutsa, Erodes niwatihi sihyrinomyry napyto waha.

¹⁴ Zinymyrykynahatsa atsikara humo nispirik-tsokdanaha. Estuba zuba tatuk zibykyknaha.

¹⁵ Iwaze Sesus ispe niy:

— O kytsa pykyhytutaha. Pariseutsa harere humo pykyhytutaha. Erodes harere humo niwatihi pykyhytutaha! Sihyrinomyrywy napyto naha waha anaty hi jokpitsihik abahi atsikara tsakyky napyto naha humo nawerekbaik. Iwaze sispirikpobyitsa siharere bo yhy mykaranaha — niy.

¹⁶ Iwaze zinymyrykynahatsa asa zuba nipamykysokonaha:

— Anatyhi nitsaso atsikara humo tsikspirik-tsokdanaha ja — nikaranaha. Iharere batu sinymyry.

17 Sesus siharere humo tsihyrinymyrëta. Iwaze atahi:

— Amy humo tsimaha ikiahatsa “Katsaktsa at-sikara byitsahi iwatahi anapytowy soho mybo nit-saso tsimaha”. Kahumo batu ahaspirikpo. Batu kabo mytsaty tsimaha. 18 Ikiahatsa ahahyriktsa katsa tuba, iwatsa tu batu iktsa zikaha. Ikiahatsa ahaspiukikitsa tuba iwatsa tu batu waby zikaha. Hawa ha ty botu ikykara tsikspiriktsokdanaha ja. 19 Atsikara mytsyhyry tsawata zitsaktsakze kytsa sizubarëtsa sïko miutsa bo nyny iky, hana wa ja peryktsa bo tsipupukunaha sa atsikara ty jerehe haty tsikaha — niy.

— Dose peryktsa tsiknasihareknaha — niaha.

20 — Atsikara usta tsyhyry humo petok zi-akyri sete zitsaktsakze, kytsa sizubarëtsa kwa-tero miutsa bo nyny iky, hana wa ja peryktsa bo tsipupukunaha sa itsatsakyhy jerehe haty tsikaha — niy.

— Sete peryktsa tsiknasihareknaha — niaha.

21 — Yhÿ iwa atsikara tsizubarëna niyzik. Ikiahatsa ahamytsatyhybyritsa tu — Sesus niy.

Sesus Betesda eze ihyrizikbyrita zizororowy.

22 Kyze Sesus Betesda Ezektsa bo niukuru, zinymyrykynahatsa tuk zumunaha. Kytsa ihyrizikbyrita ibo izioktyhyryknaha.

— O Sesus ikia ihyrizikubyita ty tsika tsimy zeka mozororo — niaha. Iwa nizapykykynaha. 23 Iwaze Sesus ihyrizikubyita tsyhyry humo paik niy. Ape baze myzubaha pauk bo ziooktyhyryk. Iwaze hezok niy. Tasaytsik ty ihyriziktsa bo tsykt-syk niy. Tatsyhyry ty ihyriziktsa bete tsika niyze:

— Hawa sa iktsa tsimy kara — niy.

²⁴ — Abaka tsikaeni zuba iktsa mykara. Kytsa hwitsa watsa kaokeryk monaukurunahatsa watsa — niy.

²⁵ Iwaze Sesus tatsyhyry ty ihyriziktsa bete tsikazo niy. Nizororo. Amypubyri niyzik iktsaziu nikara. Nizororobaba hÿ. ²⁶ Sesus ipe:

— Awahoro bo tsiksikta! Betesda bo ka erete eretebyijaty — Sesus niy.

Peduru Sesus soho humo ziny myry babata.

²⁷ Kyze Sesus tuk ziny myrykynahatsa tuk nitururuknaha. Sisarija Piripi bo niukurunaha. Piripi sihudikhudikwytsa ezektsa nisipehaka. Niukurunahaze asa zuba ske buruk inapamykysokonaha. Sesus ispe niy:

— Aty skaraba uta kahumo kytsa mytsaty mykaranaha — niy.

²⁸ Ziny myrykynahatsa ipe niaha:

— Wastuhutsa ikia pe Suão Batista nihyrikosokdata ja mykaranaha. Mektsaktsa batu niaha. Ata hi nihyrikosokdata Erias ja — mykaranaha. Ustaktsa batu.

— Ikia taparakta Deus sohokotsa nahyrikipota ja mykaranaha — niaha.

²⁹ Sesus ispe niy:

— Iki ahatsa ja. Ahaokze ka aty skaraba uta aha hyrizikze ka tsimy karanaha — niy.

Peduru tihi:

— Iki akta Kiristu. Iki akta Deus pehahababata — niy. ³⁰ — Ana tyka kytsa bo soso byitaha! — Sesus niy.

Sesus tabezewy soho nitsasoko inahyrizikpo nahasoho niwatihi nitsasoko.

³¹ Iwaze Sesus hawa mohyrikosokda naha soho nitsaso, kytsa pibezenaha soho kino nitsaso. Nisi-hyrinymyryky:

— Tapara utakta Deus zikpehata maku babata ahawata ikyzik. Sinini mykara Sudeutsa tapara taypyknahatsa kaharere bo yh̄habyitsa ziknakaranaha. Taparaktsa ziknapamykysokonahatsa Deus wahoro kahumo batu siakparawy. Iwatahatsitsa kino niwatihi kaharere bo yh̄habyitsa ziknakaranaha. Kytsa pikbezenaha. Petok puruze mynahyrizikpo — niy.

³² Iwa nitsaso kytsa nisihyrinymyryky, iharere amypubyri batu ihokdaha. Iwaze Peduru Sesus zioktyhryk. Zibetsakak ipe niy:

— Iwa katy kaja sosobyity — niy. ³³ Sesus uwok niyze zinymyrynahatsa bo iktsa niyze Peduru pe niy:

— Satanas nabo pãotyкта — niy. — Ikia Deus harere bo yh̄habyitahi tsimy, hawa kytsa mytsaty mykaranaha ana bo hi yh̄ tsimykara iwatahi Satanas wata tsimozik — niy, iwa zibetsakik.

³⁴ Iwaze Sesus kytsa sizubarëtsa bo nisihuahuaka. Zinymyrykynahatsa ahatsa nisihuahuazo. Sibonipamykysoko.

Ispe niy: — Aty katukbabata mozihikik zeka atakta pibiyituhukutu hawaha iakparawy zeka ana humo ka piwari. Kaharere bo zuba ma tsimykaranaha. Kytsa iharapatawyhyta bo iktsa

mahaze maku pibezenaha sihyrinymyrētsa. Piby-
ituhukutu kawata tsimahaktsa! Tozeka ja ikia-
hatsa kawa tu sinini tsimykaranaha! Hawa sinini
mykara naha humo kawatu sinini tsimykaranaha
hỹ. Ikiahatsa kahumo sinini tsimykaranaha zeka
ana humo hi tykymynahaktsa kytsa!

³⁵⁻³⁶ Aty tapokzitsi zuba zeka tahyrizikararawy
pihokda. Tanamy pihokzaba. Aty inamy ty
tsizubarēna piakse zeka mohyrikosokdaze
tsizubarēna mohokda. Ihyrizikararawy niwatihi
mohokda. Aty tohi kahumo ispirikpo iwaze kytsa
ity pibeze atahi Deus tuk tawahi mynapykyryk.
Atahi kahumo tispirikporēta Deus wasania ty
motsasoko atakta mohyrikosokdaze atahi Deus
tuk tawahi mynapykyryk. ³⁷ Katsa Deus tuk
mywahi tsimynapykyry tsihikiknaha zeka Deus
bo batu amy ty ibo nyny zikaha. Deus harere
humo zuba yhỹ tsimykaranaha iwaze tawahi ituk
mynapykyryk, isapyha ty mybo nyny my.

³⁸ Mektsaktsa kytsa simysapybyitsa tu
nikaranaha, asaktsa abaktsa kytsa deusbyitsa
humo yhỹ mykaranaha. Kahumo sisikpybyrētsa.
Kaharere humo kino niwatihi sisikpybyrētsa.
Utakta Deus zikpehata maku wata ikyzik. Deus
imysapyrēnikita izikwy tuk myziksizo. Bijoikpe
iknyktsa Deus tsumuēhītsitsa kino niwatihi
situk myziksizo. Myziksizoze, aty kahumo
tisikpybyrēta zeka. Uta kino ihumo kasikpybyrēta.
Aty kaharere humo tisikpybyrēta zeka. Uta
kino iharere humo kasikpybyrēta Asaktsa batu
katukytsa byitsawatsa — Sesus niy.

9

¹ Kaharere wasani mykara. Deus hi ityryktsa mynasipehaka. Kytsa abazubaha mynasipeha. Wastuhu ahatuk kytsa ana bo hi iktsa maha. Deus ahapehakatsa mozik ana bo hi iktsa maha. Bykyzehu zuba mohyrikosokdanaha.

Moises Erias iwatsa Sesus bo inatakanaha.

² Kyze mytsyhyrytsa wa zurunahaze Sesus hara bo jobonita bo kytsa nisioktyhyryk. Peduru Tsi-aku Suão iwatsa nisioktyhyryk. Asa zuba, ust-saktsa nitarenaha. Sibaze meky watu itahyryty.

³ Tisukbarazarêta niyzik. Katsaktsa ibarazabaha-
harêta batu myny hÿ. Ibaze kytsa petoktsa nataka-
hanaha. ⁴ Erias, Moises ahatsa, tubabatu ni-
hyrikosokdanahatsa tu, ituk nipamykysokonaha.

⁵ Iwaze Peduru:

— O myhyrinymyrytsa, watsa wyzik tykara eze harakykbyihi ahaparik tazi. Estuba ikia bo, estuba Moises bo, estuba Erias bo iwa — niy.

⁶ Tsipybyrêta tu amy ty ja nipamykysoko batu inymyryhy. Sipybyrêtsa tu nikaranaha. ⁷ Iwaze bijo satata inasiharasuk. Bijo satata eze nihokdanaha. Deus iaksoho ziwabynaha. Atahi ispe niy:

— Atakta katse babata, ihumo ka kamypokzit-siarêta uta iwatawyta. Mytsasoze tsiwabytokton-ahaktsa! — niy.

⁸ Nitsasobaze atsoko Sesus atazuba nitare. Paikpa iktsa nikaranaha. Sesus bo zuba nikozonehaha.

⁹ Bykyze hara jobonita ekze inasikzonehaze Sesus:

— O jabasani tsinynaha ty kaja kytsa bo ka soso byitaha! Uta Deus zikpehata ahawata ikyzik mohyrikosokdaze mynahyryzikpoze ana zuba kytsa bo tsimypamykysonaha — niy. ¹⁰ Yh̄y niaha. — Amy skaraba inahyryzikpo — mytsaty nikaranaha. Sihyrynymyrybyitsa nikaranaha, iwaze asa zuba nipamykysokonaha. ¹¹ Iwaze ipe niaha:

— Amo humo sa Moises harere mymyhyrynymyrykynahatsa hi “Tapara Erias myziksizo”. Amo skaraba iharere mymywatawy — niaha.

¹² — Wasani my. Tapara Erias mozumuze at-satu ezytyk pikymyze. Kytsa Deus humo sispirikporētsa mytsaty mykaranaha. Tubabatu utakta Deus zikpehata ahawata ikyzik kaso ho hi ziwatahanaha. “Atakta sinini mykara. Ihumo mymyijakanaha, ihumo batu siakparawy. Iharere bo batu yh̄habyitsa ziknakaranaha”. ¹³ Hawa sa ziwatahanaha Erias soho atsatuty nikaranaha. Erias hyritywata botu izumu. Isukyrytsitsa zimyijakanaha zibezena ha. Amy ty tubabatu ziwatahanaha atsatu nikaranaha — niy.

Sesus jypykyhyzytykta hyrikoso sapybara ibo pororo ziknakarata iwatahi zizororowy.

¹⁴ Kyze Sesus tuktsa usts a zinymyrykynahatsa bo zumunahaze kytsa sizubarētsa sipauk baze iktsa niaha. Sudeutsa sopykwy humo sihyrynymyrētsa zinymyrykynahatsa tuk nahapepehakanaha. ¹⁵ Kytsa sizubarētsa Sesus bo iktsa niahaze sipybyrētsa nikaranaha ibo inatururukiknaha. Iwaze ipe:

— Tsikzumu — nikaranaha. Yhỹ ikzumu Sesus niy.

¹⁶ — Hawa hatsa sa zinymyrykynahatsa tuk tsimyarape pehakanaha — niy.

¹⁷ Estuba maku tihi:

— O myhyrinymyrykytsa, katse zioқтыhyryk. Hyrikoso sapybara ibo pororo ziknakara iwatahi iharerebyita iharawita niwatihi. ¹⁸ Myzumuze wytyk bo naraha narahaka, isake soroporo, tatsaputy dy nikara itsipa ziboro. Iwaze zinymyrykynahatsa pe iky:

— Hyrikoso isapybara katse bo pororo ziknakara ata kino tsiksiwyhiknahaktsa kytsa. Ipe nabo pãoty tsimaha iky. Zinymyrykynahatsa batu zikaha — niy.

¹⁹ Iwaze Sesus ispe niy:

— Ikihatsa Deus humo batu ahaspirikpo, Deus humo ahaspirikpo byizeka iwatsa tu ahatuk mynapykyryk. Jypykyhyzytykta kabo tyzioktyhyk! — niy.

²⁰ Iwatsahi jypykyhyzytykta Sesus bo zioқтыhyryknaha. Hyrikoso sapybara Sesus bo iktsa niyze jypykyhyzytykta wytyk bo zirahawy opykani nitydydyky niy. Jypykyhyzytykta wytyk buruk paikpa niparakak weze weze nikara. Isake soroporo zipoko.

²¹ Sesus izo pe niy:

— Hawaze sa atse niwa niu — niy:

— Jabaseze tu niwa niu — niy. ²² — Hyrikoso sapybara pibeze tsihikik. Hyrikoso sapybara humo pihik bo piharazukik izo bo pioktsokik. Iwa pibeze tsihikik — izo niy. — O tymytsumuẽhĩkta!

Azikwykyta zeka tymytsumuēhīkta! Myhumo amypokzitsiakta! — niy.

²³ — Hawa sa tsimy “azikwykyta zeka”. Yhỹ ikyba. Aty Deus humo ispirikpo zeka kazikwy humo ziky — Sesus niy. ²⁴ Atsoko jypykyhyzytyktazo kakaik niy, Sesus pe niy:

— O ahumo kaspirikporēta tsikaeni zuba. Tsipiktsumuēhī zeka ahumo mospirikpotohi kaspirikporēta babata mozik — niy.

²⁵ Kytsa sizubarētsa harape baze ziknapykyknahaze Sesus ihyrikoso sapybara pe niy:

— O hyrikoso sapybara aharawita aharerebyita kino niwatihi nabo pāoty. Awahi pāoty. Erete eretebyijaty — niy. Iwa ihyrikoso sapybara zipehahik.

²⁶ Iwaze ihyrikoso sapybara kakaik niy. Jypykyhyzytykta nitydydykyk tu. Iwa niparak. Jypykyhyzytykta nirata hyrity wata niyzuknihikare niy. Iwaze kytsa tihi:

— O atakta botu nihyrikosokda — nikaranaha.

²⁷ Sesus jypykyhyzytykta tsyhyrype humo paik niy. Zitsumuēhīkī ity kyik niy. Tsakurēta niyzikzo.

²⁸ Iwaze Sesus wahoro bo paku niy. Asazubaze zinymyrykynahatsa ipe niaha:

— Amo skaraba katsa ihyrikoso sapybara ty batu tyiksiwyhik batu zikaha — niaha.

²⁹ — Deus bo pamykyso byizeka ihyrikoso sapybara tawata ba ziksiwynaha — Sesus niy. Iwa hỹ.

Sesus tasukmozawy soho tahyrizikpowy humo kino niwatihi nitsasokozo.

³⁰ Kyze niukurunahaze, Sesus nisi-hyrinymyryky. Haneze niy kytsa batu

sihyrinomyry anahi ziny tsihikik. Karareu buruk niukurunahaze zinyomyrykynahatsa zuba nisihyrynomyryky. ³¹ Sesus:

— O aibani kasukyrytsitsa pikbezenaha. Pikbezenahaze petok puruze mynahyrizikpo — niy.

³² Zinyomyrykynahatsa asa zuba:

— O amy skaraba “mynahyrizikpo” — mytsaty nikaranaha. Zinyomyrykynahatsa tahasikpybyspyk tu batu ity peha.

— *Aty sa myhyrizikwanita mozik Deus tyryktsa tuk — nikaranaha.*

³³⁻³⁴ Kyze zinyomyrykynahatsa Sesus hapik ske buruk niukurunaha. Asa zuba nipamykysokonaha. Kytsa tihi:

— Utakta mypehatsa wata. Ahazubarētsa tyziktsumuēhīnaha! Ūsta:

“O batu, utazakta! batu, utazakta!” — nikaranaha. Kyze Kaparanaū bo zumunahaze, Sesus ispe niy:

— O kytsa hawa skaraba tsiktsasokonaha. Ske buruk tsikukurunahaze hawaha tsiktsasokonaha — niy. Tahasikpybyspyk. Batu harere. Batu yhy.

³⁵ Iwaze Sesus itadyhyze:

— Kapauk baze dyhy dyhytaha! Tsipiwabynaha. Ikiahatsa:

“Utakta mypehatsa wata sizubarētsa moziktsumuēhīnaha” tsikykarannahaze, Deus kino myha batu. Deus tihi:

“Aty sa tatukytsa mysitsumuēhīekik, atahi mypehatsa wata. Atahi katyryktsa tukta myhyrizikwanita my” niy. Hyỹ nikaranaha. Hawa sizotsa mozihikiknaha siharere humo astsa tu nikaranaha iwa Deus harere bo hyỹ

tsimykaranaha zeka iwaze Deus tyryktsa tsimoziknaha. Iwa ahabyi zeka batu Deus tyryktsa tsimoziknaha — niy.

³⁶ Iwaze Sesus jabasitatsa tsibik tahatazaha eze tyrikto niy. Ziharapykze sibo ziwatawyky:

³⁷ Sesus:

— O jabyitsa humo ahamypokzitsiukrëtsa zeka, niwaha humo ka kakurëta. Ikiyahatsa kahyrytsa watsa. Jabyitsa humo ahamypokzitsiukrëtsa zeka kahumo niwatihi ahamypokzitsiukrëtsa. Iwaze ikiahatsa humo kakurëta zeka Deus kino niwatihi. Atahi mybarawy bo zikpeha — ispe niy.

Asaktsa mybo batu sisakanibyitsa mytuktsa moziknaha.

³⁸ Kyze Suão Sesus bo nipamykysoko:

— O myhyrinomyrykytsa maku tsinynaha hyrikoso sapybara nisiksiwyhik azikwy humo. Atakta katsa mytukbyita tu iwatsahize katsa ipe:

“Batu tihikta! Ikiakta mytyrykbyita tsimy” — tsikaha.

³⁹ Sesus:

— O batu. Ahasopyksapybyritsa tsimykaranaha. Aty tohi amy ty kytsa batu zik kahumo my zeka atakta kaokzeka pisapywyky. ⁴⁰ Kahumo tsakurëta mozik. Asaktsa myhumo sisakanibyitsa mytukytsa moziknaha.

⁴¹ Kaharere wasani hỹ tsiwabytoktokonaha. Aty pihik ty ahabo nyny my zeka ikiahatsa Kiristu tuktsa humo atakta isapyha ty ibo nyny my — niy.

Imysapybara ty pimoewy zeka iwaze hi Deus piokzo.

⁴² Sesus nisihyrinomyrykyzo. Kytsa jabyitsa bo nisiaknikinaha soho Sesus ispe niy:

— Aty harahare ty pisoikañhiknaha zeka iwaze pihik maporik bo nipapykik iwaze moharazukik ana humo batu isapy. Atakta jabyitsa kahumo tispirikporêta tu zeka zimiwyky ana humo batu imysapy. Atakta imysapybyrênikita babata.

⁴³⁻⁴⁴ Atsyhyrype ahumo isapybyri zeka, atsyhyrype ty iykzykikty. Deus sapy bo tsimytsukze atsyhyrype estuba zuba zeka wasani. Sinini ykarawy bo zeka atsyhyrypetsa petok zeka wasanibara bo tsipasapy. Sinini ykarawy anaeze izo ba zikbe. Anaeze winuputsa tahawahi mynapykyryknaha.

⁴⁵⁻⁴⁶ Apyry humo isapybyri zeka apyry ty iykzykikty. Deus sapy bo tsimytsukze apyry estuba zuba zeka wasani. Sinini ykarawy bo zeka apyrytsa petok zeka wasanibara bo tsipasapy.

⁴⁷ Ahyrizik humo isapybyi zeka ahyrizik ty hyrykokik ty. Deus sapy bo tsimytsukze ahyrizik estuba zuba zeka wasani. Sinini ykarawy bo zeka ahyriziktsa petoktsa zeka wasanibara bo tsipasapy. ⁴⁸ Sinini ykarawy eze ka izo ba zikbe. Anaeze winuputsa tahawahi mynapykyryknaha. Sinini mynakanaha. Anaeze tsizubarêna batu mysapy, kytsa tawahi mynapykyryknaha. Iwatsahi mysapybaraka tamoewyhik.

⁴⁹ Hawa katsa poro siraratsani kykywy iwazeka ba ziktahôrõ anahyryty wa ha Deus mymysininiwy iwaze imysapybaraka tsimoewynaha. ⁵⁰ Poro tisapyrêna. Poro morÿk byizeka ba zik tsakykyzonaha. Poro iôrÿkbara wytyk humo batu sapy mozik mymaiwy. Poro mydisahawy tsakykyha wasani my. Iwa hyryty wa

ha ahamysapyhuktsa kytsa! — niy. Tynaharape pokzitsikinaha.

10

Sesus myokeza moewy soho humo nisihyrinymyryky.

¹ Iwaze Sesus niparak. Sudeja bo. Sorodão buburu zitsikza. Iwaze myzubaha ibo inakypykyknaha nisihyrinymyrykyzo.

² Pariseutsa zukzuk niaha. Izumunahaze ibo nipamykysokonaha. Asatu niharapepehakana-hatsa tu iharere zimyi tsihikiknaha. Ipe niaha:

— Hawa sa wasani maku taoke pimoewyhih zeka Moises harere bo ja batu yhy ha — niaha.

³ Sesus:

— Amo taparakta Moises harere botu zahapehaka — niy.

⁴ Moises tihi:

— Maku taoke pimoewy tsihik zeka tapara papeu atatsa soho piwataha iwaze atatsa pãoty zikaha my. “Ikia hi batu kaokebyitatsa” piwatahaka — niaha. Iwa kytsa siokeza siakparawy byizeka ziknakaranaha. Aokzeka ja wasani nikaranaha.

⁵ Sesus ispe niy:

— Ikiahatsa Deus harere bo yhy ahabyitsa tsikykaranaha. Iwatsa tu Moises ahaharere bo yhy niy. Deus harere bo ahawabytoktobyitsa tu tsimykaranaha iwaze Moises ahaharere bo yhy niy. ⁶ Tapara Deus mybarawy nizuknize iwaze maku wytyk ahatsa niwatihi nisisukni. Petoktsa nisisukni. ⁷⁻⁸ Iwatsahi kytsa tahazotsa bara botu tahasapynaha tahaokeza tuk zuba tahasapynaha.

Isukzata batu ata zuba mozuru harapetok mozurukunaha. ⁹ Iwatahi Deus maku ibarikta nizukni atatsa ioke nizukni niwatihi Deus okzeka estuba zubata wata iwatahi ba zikaharapemowynaha. Iwa zeka batu imysapy — niy.

¹⁰ Iwaze Sesus tuk zinymyrykynahatsa wahoro bo pakuzo niaha. Asa tihi:

— Amy ty sa nisihyrinymyryky — niaha.

¹¹ Iwaze Sesus ispe niy:

— Maku taoke moewyky zeka mektatsa tu piakse zeka batu imysapy my. Taoke humo batu imysapy my. ¹² Iwa wytyk atatsa kino tabarikta moewyky zeka mekta tu piakse zeka. Atatsa imysapybyitatsa. Tabarikta humo batu imysapy — niy. Nawa Sesus sibo nipamykysoko.

Sesus jabyitsa tuk.

¹³ Kyze wastuhu sizotsa tahahyrytsa Sesus bo nisioktykyryknaha.

— O Sesus myhyrytsa ty paik tsimy zeka sakurētsa tsimoziknaha — niaha. Zinymyrykynahatsa sihumo sisakparētsa iwatsahi batu ibo zuk.

— O nabo tsiksizonahaktsa! — niaha. ¹⁴ Sesus ziwabyze takyriki. Sesus:

— “O nabo tsiksizonahaktsa!” soso byitaha! Jabyitsa uta kabo tynasioktyhyknahaktsa! Deus tyryktsa jabyitsa watsa. ¹⁵ Jabyitsa kino isapyha ty isty nyny my zeka sakurētsa moziknaha: yh̃ sisopyk. Jabyitsa watsa zeka Deus pe: yh̃ tsimaha. Deus pe: yh̃ aha byizeka ityryktsabyitsa tu tsimaha — niy.

¹⁶ Sesus sihyrytsa nisibykyk, siwatu isty paik niyze. Deus pe:

— O kazo sihyrytsa tynasipokzitsikikta — niy.

ekze niparak tisukatsihikrēta. ²³ Iwaze Sesus zinymyrykynahatsa bo iktsa niy. Ispe niy:

— Sinamyrētsa Deus tyryktsa moziknaha tsihokdaharēna. Tahanamy bo zuba mytsaty mynakaranaha.

²⁴ Zinymyrykynahatsa iharere humo nipybybaiknaha. Sesus nitsasokozo:

— O kytsa katukytsa watsa hawa Deus tyryktsa moziknaha tsihokdaharēna hỹ Deus harere bo yhỹ ahabyitsa iwatsahi ba Deus tyryktsa zikyzyknaha. ²⁵ Tsihokdaharēna siraratsa kamero inarokota mysukwowowy ispioke buruk mytsuk. Tsinamyrēta Deus tyryk mozik tsihokdaharēna hỹ batu zik — niy.

²⁶ Ana humo ziwabykynahaze sipybyrētsa asa zuba nipamykysokonaha.

— Aty skaraba Deus tyryktsa moziknaha — nikaranaha.

²⁷ Sesus sibo iktsaziu niy. Ispe niy:

— Kytsa tuka batu zikaha. Deus humo ka batu amy tohi ihokdaha.

²⁸ Peduru ipe niy:

— Niwazuba! Katsaktsa mybo ka iktsa tykta, mynamy mywahoro eze niwatihi tsizubarēna tsikzerebaiknaha iwaze ikia tuk tsimymysapynaha — niy.

²⁹ Sesus:

— Kaharere wasani my. Wabyziutaha! Aty tawahoro perekek zeka katukta mozik, atakta Deus wasaniha humo tispirikporēta mozik. Atahi abaka sē sizubarētsa wahoro ty nyny mykara, ana wata aty tatukytsa myserekek zeka, taziky, tatsy, taje, tazo, tahyrytsa tatsuhuk iwa myserekba zeka

ustsa itukytsa Deus ibo nyny my. Sě itukytsa sizubarětsa hỹ.

³⁰ Abaka ustsa ziky, itsy, ije, izo, ihyrytsa, itsuhuk sě sizubarětsa ty iwa ibo nyny mykara. Ustsa pisapybyriki. Kyze atakta mohyrikosokdaze Deus baze tawahi mynapykyryk. ³¹ Sizubarětsa tihi: “O katsakta myhyrizikwanitsa tsa watsa tsimoziknaha” mybarapetu nikaranaha. Asakta siapiktsa zuba moziknaha. Abaka sizubarětsa siapiktsa maha asahi sihyrizikwanitsa watsa moziknaha — Sesus niy.

Sesus tabzewy soho nitsasokoza tahirizikpowy soho niwatihi nitsasokoza.

³² Kyze Serusarěhe bo niukurunahaze Sesus siharaze niukuru. Zinymyrykynahatsa ihumo mytsaty nikaranaha. Ustsa kytsa siapik niukurunaha sipybyrětsa nikaranaha. Iwaze Sesus tuk zinymyrykynahatsa bo nipamykysokoza, hawa sa ihumo my.

³³ — Wabyziutaha aba katsa Serusarěhe bo tsikukurunaha. Uta Deus zikpehata ahawata ikyzik Serusarěhe bo mokuru. Nakpo zukzuk tsimahaze kytsa taparaktsa Deus wahoro eze ziknapamykysonahatsa, Moises harere ty nisihyrinymyrynahatsa iwatsa kasukyrytsitsa bo pikoktyhyryknaha. Pikspihikbatanaha. “Atakta Deus okzeka batu mysapy mykara, katsa kino niwatihi atakta batu mysapy mytsaty tsimykaranaha” motsasonaha. Bipyritsa bo pikoktyhyryknaha. ³⁴ Pikuezozokoknaha. Pikikinaha. Pikbezenaha. Iwaze petok puruze

mynahyritziko. Utakta Deus zikpehata, ahawata
ikyzik pikbezenaha — Sesus niy.

Tsiaku itsy Suão ahatsa Sesus bo nizapykykynaha.

³⁵ Kyze Tsiaku itsy Suão niwatihi Sesus bo izumunaha. Asa hi Sebedeu hyrytsa niaha. Sesus pe niaha:

— O myhyrinomyrykytsa abo tsimyzapykykynaha zeka atsatu mybo yhỹ tsimy — niaha.

³⁶ — Amy sa tsimyzihikiknaha — niy.

³⁷ — Ikia aparakbaha abazubata tsimozikze kat-saktsa abaze dyhy dyhy tsimaha. Estuba apaturyk taba dyhy my. Usta apawazo taba dyhy my — niaha.

³⁸ — Amy sa tsimyzapykykynaha batu ahahyrynomyry. Tozeka ja sinini tsimaha kawata ja. Pikbezenahaze ikiahatsa ja. Kawata pahabezenaha zeka ana kino ahapunihiku ja.

³⁹ Yhỹ niaha.

Iwaze Sesus ispe niy:

— Sinini tsimaha kawata hỹ. Pahabezenaha kawata pikbezenaha hỹ. ⁴⁰ Aty kabaze dyhy my ba ziktsaso. Aty kapanuryk taba dyhy my. Aty kapawazo taba dyhy my ba ziktsaso. Deus botu nisiwatawy utakta batu — Sesus niy.

⁴¹ Utsa zinomyrykynahatsa Tsiaku Suão ahatsa harere ziwabynahaze taokanikinaha. ⁴² Iwatahi Sesus tabo inasipehaze ispe niy:

— Bipyritsa pehatsa kytsa sizubarẽtsa mysipehakanaha. Katsa abazubatsa mytsaty ahabyitsa mykaranaha. Kytsa ziknasipehaikiknaha. Ana tyhi ahahyrynomyrẽtsa.

⁴³ Ikiahatsa ahatuk batu. Aty mysipeha

tsihikik atahi sizubarëtsa mysitsumuëhĩ. ⁴⁴ Aty myhyrizikwanita mozihikik ahatuk sizubarëtsa mysitsumuëhĩkĩ.

⁴⁵ Utakta Deus zikpehata ahawata ikyzik. Mybarawy bo inasikze myzubaha mysitsumuëhĩ. Myzubaha humo ba katsumuëhĩhuk kytsa katy ba ziktsumuëhĩnaha ana bo ka batu zuk. Ikzumuze mybarawy ezektsa sisapyzeyky mohyrikosokda iwatsahi asaktsa Deus tuk tahawahi mynapykyryknaha. Kabzewy humo kytsa simysapyrëtsa moziknaha ana bo hi ikzumu — niy.

Sesus ihyrizikubyita zizororowy.

⁴⁶ Kyze Baratimeu ihyrizikubyita zizororowy. Sesus zinymyrykynahatsa tuk Serikoho bo niukurunaha. Kyze Serikoho zipokonahaze kytsa sizubarëtsa siapik niukurunaha. Ihyrizikubyita Baratimeu Timeu tse Serikoho ske sak eze nidyhyky. Ba zikozo batu amy tohi humo ziky. Kytsa ziharamunahaze sakpyri zuba ziwaby.

— O kaboja, kaboja! — nikara. Kytsa okyrysaro ty ibo nyny niaha. Siske eze nidyhyky. Kytsa Baratimeu pe:

— Sesus Nasare ezekta mozumu — niaha.

⁴⁷ Iwaze Sesus ibaze Baratimeu kaka niy:

— O aidytykta Sesus! Tyziktsumuëhĩkta! O Sesus ikia mydiri Dawi tse kahumo amypokzit-siukta — kaka niy.

⁴⁸ Kytsa zibetsakaknaha:

— O aksobyitykta! — niaha. Tybyi zuba niy:

— O tyziktsumuëhĩkta kahumo amypokzit-siukta, Sesus! — kakazo niy.

⁴⁹ Sesus itarikto:

— Pany! Uta kabo tyzioktyhyknaha! — niy.
Kytsa ihyrizikubyita zihuahuahiknaha:

— O apybybyihukta! Riktotyкта! Sesus
pahuahuaka — niaha.

⁵⁰ Atsoko itarikto. Tasuk izezerēnikita
zibokikare. Sesus bo niparak.

⁵¹ Sesus:

— Amo skaraba hawa sa my — niy.

— O myhyrinymyrykytsa ba zikozo. Kahyri-
zytsa tysizororowyкта! — niy.

⁵² Sesus:

— Ikia kahumo aspirikporēta. Iwatahi pazoro-
rowy — niy.

Iwaze nihyriziktsa nisizororowy nikozozo.
Sesus hapik niukuru.

11

Sesus Serusarēhe bo zumuku.

¹ Kyze Sesus tuk zinymyrykynahatsa
Serusarēhe bo niukurunaha. Betepake Betanija
baze na hara jobonikita Oriwereja inarokota baze
anaeze Sesus tatuktsa petoktsa nisipeha:

² — Nabo pāotaha kytsa. Atsezubaha my-
haraze tsimypupunahaze pikuza tsibik tsipipiktu-
munaha. Ata bo hi isoikāihita tsipinynaha, batu
aty tohi ibete dyhy. Satsukyктаha! Kabo tyziok-
tyhyknaha! ³ Utsa kytsa:

“Hawa sa tsimykaranaha” maha zeka,
“Mypehakatsa mype niy kabo tyzioktyhyknaha”
tsimaha! “Bykyze ahabo tasirezo” tsimahakta! —
niy.

Yhỹ niaha.

⁴ Iwaze niukurunahaze, pikuza ske eze ziny-naha hokbowy baze zikahanaha. Isoik ihañhita bo zisatsukyknaha. ⁵ Utsa kytsa sibaze tutsa:

— Hawa sa tsimykaranaha. Hawa hatsa sa pikuza tsipsisatsukykyknaha — niaha.

⁶ — O mypehakatsa tihi mype niy pikuza tsibik kabo tyzioktyhyknaha. Bykyze ahabo tasirezo — niaha.

— Yhỹ. Tsioktyhyryknahaktsa! — niaha.

⁷ Sesus bo pikuza ziooktyhyryknaha. Tahasuk pikuza bete zizozokonaha. Sesus ibete niukuru.

⁸ Iwaze ustsya kytsa kino niwatihi tahakpyzazawy ske buruk zipaparakanaha. Tsarakzapatsa jerukbara ezektsa ty bokok bokok ky niaha ana humo kino niwatihi ske buruk nisipaparakanaha. Iwa tsimykaranaha Sesus tsimysapyrẽta humo asazuba nipamykysokonaha ⁹ Sizubarẽtsa Sesus haraze, kytsa iapik kino niwatihi niukurunaha, myzubaha zihuahuakanaha.

— Sesus Deus baze niapykyk, mywata niyzik.

Deus bazekta tu, katsa mybo izumu. Deus mybarawy bo zipeha.

Atakta tsimysapyrẽta.

¹⁰ Taparakta Dawi mydiri wata “O Deus ibo zis-apywy iwatsahi mykurẽtsa!”

Ata humo Deus tyryktsa tsimoziknaha. Atahi wasani mynakara.

“O ihumo mykurẽtsa hỹ” — nikaranaha.

¹¹ Iwaze Sesus Serusarẽhe bo niukuru. Deus wahoro zubata bo nitsuk. Paikpa kytsa bo iktsa nikara. Zunubakaze, Betanija zinymyrykynahatsa tuk ziksizonaha.

Sesus umaha soho humo nisihyrinymyryky.

¹² Sesus estuba zuruze zinymyrykynahatsa tuk Serusarēhe bo ziksizonaha. Niukurunahaze irapa izumu. ¹³ Ĕrykani umaha bo iktsa niaha. Tisarozubarēta niy. Iwaze Sesus umaha bo nakpo zuk niyze iharabyita botu zuk niy. Ihara ziberiki. Isaro zuba. Batu iharaka. Aibani zuba tahara. ¹⁴ Iwatahi umaha pe niy:

— Niwazuba! Aharahokbita ba aty tohi ahara zezukzo — niy.

Ana humo hi zinymyrykynahatsa ziwabynaha.

Sesus Deus wahoro zubata isturupe bo nitsuk.

¹⁵ Kyze Sesus tuk zinymyrykynahatsa Serusarēhe bo niaha. Deus wahoro zubata isturupeze bo nitsuk. Kytsa asaktsa myraratsa ty ziknasihuakaknaha okyrysaro humo. Utsaktsa bipyri okyrysaro humo Sudeutsa okyrysaro ty ziknasihuakaknaha. Iwaze Sesus sizubarētsa nisiksiwykik. Atsoko nitururuknaha. Asaktsa okyrysaro ty nisihuakaknaha sidisahawyzozokorowy nisitsihipetotokokbaik. Asaktsa amytudutsa nisihuakaknaha sidyhywytsa nisitsihipetotokokbaik. ¹⁶ Sesus ispe niy:

— Batu amy tohi Deus wahoro zubata isturupeze sinamy ba zisikta batu skeke — niy. ¹⁷ Iwaze nisihyrinymyryky.

— Deus harere tubabatu ziwataha tihi:

“Kawahoro zubata haneze nanabytabaktsa myzubaha kabo mynapamykysokonaha” ziwataha. Ikiahatsa kawahoro sityhyryboarētsa wahoro tsimyzyphuaknaha — niy.

¹⁸ Taparaktsa ziknapamykysokonahatsa, asaktsa Sudeutsa sopykwy zikziwatahakanahatsitsa kino niwatihi iharere ziwabykynaha. Ana kino

ziwabynahaze pibeze tsihikiknaha. Ipokso sipybyrētsa. Myzubaha Sesus harere bo yh̄y mykaranaha ihumo sispirikporētsa iwatsahi ipokso sipybyrētsa. Isukyrytsita tu pibeze tsihikiknaha myzubaha pokso tsawyzik batu zikaha.

¹⁹ Zunubakaze Sesus zinymyrykynahatsa tuk niparakzo. Betanija bo ziksizonaha.

Umaha niharapara tasoho.

²⁰ Byri zokorobyitu niukuruzonahaze umaha bo iktsa niaha. Iharatatsa niharaparabaiknaha.

²¹ Nezeba Sesus nipamykysoko ana bo hi Peduru mytsaty nikara iwaze ipe niy:

— O myhyrinymyrykytsa iktsa tykta! Umaha ikia tsikykarata niharapara — niy.

²² Sesus:

— Deus humo ahaspirikporētsaktsa! ²³ Kaharere wasani my. Wabyziutaha! Hara jobonita bo tsipepehanaha zeka “Nabo pāoty buburu zuba bokta”. Nawa tihi my. Ba mytsaty tsimaha “O buburu zuba bo ja, batu yh̄y ja” tsimaha. Aha-harere humo buburu zuba bo my. Deus humo tsimyspirikponaha zeka hawa ha sa tsimyzapykykynaha atsatu ahabo nyny my.

²⁴ Hawa ha ty Deus bo tsimyzapykykynaha zeka ana humo hi Deus ahabo nyny my, iwa tsimaha zeka ihumo tsimyspirikponaha. Nawaze ahabo nyny my h̄y.

²⁵ Deus bo tsimypamykysokonahaze kytsa humo batu ahakryi. Ikia tsipakryiki zeka ustsa simysapybaratsa humo aha bo mahaze ana humo ka tyspiriktsokdakta iwatsa tu tysiokzohik tsimaha. Simysapybyitsa tu nikaranaha

tsimysiokzohik zeka myzo bijoikpe ezekta ahamysapybyi humo pahaokzohik.

²⁶ Ikiahatsa kytsa simysapybyitsa bo mytsaty tsimykaranaha zeka myzo bijoikpe ezekta kino ahamysapybyi humo ba zikspiriktsokda ba za-haokzohik — Sesus niy.

Aty harere humo Sesus kytsa mysipeha. Aty sa ipe: — Natihikta — my.

²⁷ Kyze Serusarêhe bo niukuruzonaha. Sesus Deus wahoro zubata eze zitabakaze taparaktsa Deus wahoro ziknapamykysokonahatsitsa, Sudeutsa sopykwy zikziwatahakanahatsitsa, taparaktsa Sudeutsa kapitãotsa nisipeha iwatsa ibo zumunaha. ²⁸⁻³⁰ Ipe niaha:

— Aty sa ikia pe Deus wahoro zubata kytsa tysiksiwyhik! Katsyhyryze tarabajakta! tsimykara. Aty sa zapeha — niaha. Batu ihumo siakparawy iwatsahi ibo nipamykysokonaha. Iwaze Sesus ispe niy:

— Aty sa Suão Batista pe: “Kytsa tysiharasusukta” niy. Aty sa Suão Batista zipiha. Tozeka ja Deus ipe niy. Tozeka ja kytsa ipe niaha. Aty sa kabo tsimytsasonahaze uta kino ahape my. Aty kape:

“Tarabajakta iwa tihikta” my — niy.

³¹ Iwaze taparaktsa kapitaõtsa asa zuba nipamykysokonaha.

— Hawa sa tsimaha Deus ipe niy zeka kytsa tysiharasusukta tsimaha zeka iwaze Sesus mype:

“Amy skaraba Suão humo ahaspirikpobyitsa tsimaha” — my.

32 — Katsa batu tyso “Kytsa ipe tysiharasusukta”. Myzubaha Suão Deus sohokotsa babata humo ka sispirikporëtsa iwatsahi kytsa pokso batu tyso, kytsa ipe tysiharasukukta batu tyso — nikaranaha.

33 Iwaze ipe niaha:

— Suão Batista soho humo batu myhyrinymyry — niaha.

Iwaze Sesus ispe niy:

— Uta kino ahabo ba ziktsaso aty kape:

“Tarabajakta” — niy.

12

Duabohotsa perytsitsa sisopyksapybyikitsa soho humo nitsasoko.

1 Iwaze Sesus myzubaha bo nipamykysokozo. Waratok humo nikaranahatsitsa soho nitsasoko iwa nisihyrinymyryky. Atahi:

— Maku estuba duabohotsa nisiparikik. Nisiparikikze jokarawytsa ty okehyry okehyry niy. Ihoke ziuku anaeze kytsa duabohotsa tsik nisipypyrikiknaha. Iwaze tsihitsa jo bo isparik ziziki anaeze ziperykykta duabohotsa nisisukparaka. Waratok tsihitsa niparakze kytsa pe: “Utakta mu. Nokponi mokuru. Ikiahatsa duabohotsa tysiperynaha! Tsapukte buruk kaperytsa humo duabohotsa ty ahabo nyny my” niy. Yhÿ niaha. Iwaze tsihitsa meky botu itasapy.

2 Kyze duabohotsa nijakuknahaze tsihitsa tatsumuëhÿtsa pe: “Tupaktsa! Iperytsitsa bo tsimy.

Abaka duabohotsa nakymynaha, siperytsitsa mysizykyknaha. Iwaze okyrysaro tsapukte bo duabohotsa huak humo kabo tyzibykyk!” niy. Yhỹ niy. Niparak.

³ Zumuze duabohotsa perytsitsa nizokbatsinaha. Nitsakikinaha. Awani ziksiwyhiknaha.
⁴ Iwaze duabohotsa tsihitsa usta tsumuẽhĩtsa zipeha. Anabo zumuze zimyjakanaha. Ziharektotokoknaha.

⁵ Iwaze ustsã tsumuẽhĩtsã nisipeha. Wastuhu nisikikinaha ziksiwyhiknaha. Ustsã nisibanaha. Hawa tapara tsumuẽhĩtsã sisopyk atsatu ustsã bo niaha.

⁶ Iwaze itse babata zuba are niy, ihumo tsimypokzitsiarẽta. Iwatatu tatse sibo zipeha. Tapetu nikara:

“O katse humo ka ja ba zikaha” mytsaty nikara.

⁷ Iwaze duabohotsa perytsitsa itse ziny nahaze asa zuba nipamykysokonaha. Asa tihi:

“Atakta duabohotsa tsihitsa tse my. Ata kino izo mohyrikosokdaze izo namy takse. Duabohotsa tsaizekita takse. Tabezehiktsã kytsã! Tsipibezenaã zeka katsã hi duabohotsã tahakse-naha” niaha. Iwa asa zuba nipamykysokonaha.

⁸ Iwaze tsihitsã tse nizokbatsinaha. Zibezehiknaha. Inury duabohotsã kosobara bo nipapykiknaha.

⁹ Tsihitsã ziksize hawa my duabohotsã perytsitsã bo my — Sesus niy.

— Atahi mozumuze iperytsitsã mysiba. Duabohotsã mektsã botu nyny my. Duabohotsã sukpe-sapy ty ustsã skezokotsitsã bo nyny my — Sesus nikara.

¹⁰ Tubabatu Deus harere papeu humo botu zi-watahaka. Ana hi tsinymyrykynaha.

— Harahare wahoro mozoknikitsitsa batu isapy mytsaty nikaranaha iwatsahi nipapykik-naha,

ata hi harahare abazubata niyzik iwatahi wahoro tisapyrēna niyzik — Deus harere niy.

¹¹ — Ana hi Deus mykara. Iwatsahi katsakta:

“O tisapyrēna. Tsipisapywyky tsimaha. Deus mypehatsa ihumo hi tisapyrēna hỹ tsimaha”.

Iwa tubabatu Deus harere papeu humo botu zi-watahaka — Sesus niy.

¹² Iwaze sisukyrytsitsa sihyrinymyrētsa. Hawa nitsasoko sisoho nipamykysoko ana humo hi sihyrinymyrētsa. Iwatsahi itsipa humo ziocky tsihikiknaha. Kytsa pokso sipybyrētsa. Iwaze sisukyrytsitsa zerekeknaha ziksinaha.

Kytsa okyrysaro humo Homa Sesa abazubata bo nyny mykaranaha ja.

¹³ Kyze asakta Sesus sukyrytsitsa Pariseutsa, Erodes tuktsa kino niwatihi kytsa Sesus bo nisipehakanaha. Nizokparakanaha iharere batu isapy mozihikiknaha ana wakysukik Sesus bo zumukunaha. ¹⁴ Zumunahaze asa hi:

— O myhyrinymyrykytsa tisapyrena haty zuba nisihyrynymyryky ana humo myhyrinymyrētsa. Kytsa pokso batu apyby, kytsa abazubatsa humo ikia batu asikpyby. Kytsa aharere siakparawy byizeka batu asikpyby. Amy bo mytsaty tsimykaranaha tsihyrinymyrēta hỹ. Deus harere ty zuba tsimysihyrynymyryky. Ahyrinymyrywy baba ty zuba tsimykara. Tozeka ja mypehatsa

abazubata Homa Sesa okyrysaro ibo nyny tsimaha. Tozeka ja batu nyny tsimaha. Hawa sa batu myhyrinymyry — nikaranaha.

¹⁵ Sesus simysapybyi humo tsihyrinymyrēta. Iharere batu sapy mozikiknaha humo tsihyrinymyrēta. Iwaze ispe niy:

— Amo kaharere humo imysapybara tsimyzi-hikiknaha Okyrysaro ty estuba kabo nynytaha! Okyrysaro wata bo iktsa taha — niy.

¹⁶ Okyrysaro wata ty estuba ibo nyny niaha.

— Aty naro sa okyrysaro humo ziwatahaka. Aty hyrikoso sa okyrysaro humo ziwatahaka — niy:

— Abazubata Sesa hyrikoso okyrysaro humo — niaha.

¹⁷ Sesus:

— Niwazuba. Abazubata Sesa namy ty ibo tu tysizotahaktsa! Okyrysaro ty abazubata Sesa bo tsisizonaha. Hawa ha Deus mozikik ana ty zuba Deus bo nyny tahaktsa! Deus hawa ty mozikik ibo tysizotaha — Sesus niy.

Iharere ziwabynahatsa paikpa iktsa nikaranaha.

Mynahyrikpo naha soho nitsasoko.

¹⁸ Kyze wastuhu Sadusitsa Sesus bo zumunaha. Asaktsa tsimyhyrizikosokdanahaze ba ziknahyrikponaha mykaranaha. ¹⁹ Iwatsahi Sesus pe niaha:

— O myhyrinymyrykytsa, tubabatu Moises ziwatahaka. Deus harere myhumo ziwatahaka atahi “Taparakta maku nihyrikosokdaze itsy haramukuka ziaксе. Iwaze atatsa tabykyhyze mopurukze kytsa tihi: ‘O izikytse mopuruk’ maha” niy. Iwa Deus harere papeu humo

ziwatahaka. Ipezo maha. ²⁰ Kyze kytsa sete itukytsa nisakba. Taparakta tasukza. Kyze hyrytsa ahabyita tu nihyrikosokda.

²¹ Kyze itsy haramukuka bo zipytsawy. Itsy kino niwatihi ihyrytsa byita tu nihyrikosokda. Bykyze itsy taziky wanu sapy bo ziaксезое ata kino ihyrytsa byita tu nihyrikosokda.

²² Iwa itukytsa nisakba katsyhyrywatsa sete atatsa ziaксе. Estuba nihyrikosokdaze usta itsy atatsa zioктыhyryk siwatu atatsa zioктыhyryk. Kytsa hyrytsa ahabyitsa tu niakbakanaha. Iwaze atatsa kino niwatihi nihyrikosokda.

²³ Kyze nawa puruze sizubarëtsa mynahyryzikponahaze aty sa ibarikta babata niaha. Sete itukytsa atatsa ziaксеnaha iwatsahi aty sa ibarikta babata — niaha.

²⁴ Iwaze Sesus ispe niy:

— Ana humo kino zahaspihikbatakanaha. Deus harere siakbatsa sohowy humo batu ahaspirikpo. Deus zikwy humo batu ahaspyrymyry. ²⁵ Abaktsa kytsa tahasukzanaha. Wytykyryk mysiaksekenaha. Iwatsa tu mohyrikosokdanahaze mynahyryzikponaha. Inahyryzikponahaze sisukzabyitsa bijoikpe eze tu mynapykyknaha. Ba zikarazonaha. Iwaze bijoikpe iknyktsitsa watsa moziknaha asahi batu tahasukza — niy. ²⁶ — Tsinyhyrikosokdanahaze tsinahyryzikponaha ana ty hi tsinymyryknaha — niy. Tubabatu Moises ziwataha, ana papeu humo ja batu ahaspyrymyry. Mytsatyta! Moises okyryrsaro mokorobaka soho ziwatahaka. Hana eze okyryrsaro ikny Deus yksoho ziwaby. Deus tihi:

— Utakta Deus my. Taparakta Abarão kahumo tispirikporêta. Adiri Isake niwatihi kahumo tispirikporêta. Adiri Sako kahumo tispirikporêta. Iwa — niy.

²⁷ Kytsa niakbakanahatsa Deus humo batu sispirikpo. Kytsa asatu zuba ihumo sispirikporêtsa. Iwatsahi asaktsa tapara niakbakanahatsa aba kino asatu sispitu. Iwatsahi Deus tihi:

— Uta hi Deus my asahi kahumo mospirikpokonaha. Iwatsahi kytsa batu myhyrizikpozo mytsaty tsimykaranaha zeka batu wasani tsimaha, tsipimynaha — ispe niy.

Amy ty Deus harere aba zuba iharereta.

²⁸ Kyze estuba siwatahakatsa Sesus bo niy. Hawa isukyryktsitsa pe nitsasoziuku ziwaby. Iwaze Sesus pe niy. Atahi:

— Amy ty sa Deus harere aba zubaha iharere. Tisopykzubarêta sa — niy.

²⁹ Sesus ipe niy:

— Deus harere iwa aba zuba my. Wabytaha Isareu ezektsa! Deus estuba zuba koikny baktatu atahi Deus babata. Ihumo ahaspirikporêtsa.

³⁰ Deus harere bo zuba hyÿ tsimykaranaha. Ibo zuba mytsatzyiuty. Ihumo ahamypokzitsirêtsa babatsa. Itsyhyrype ze tarabajaziuba tsimykaranaha. Tsahapaikrêtsa itsyhyrypeze ahahtyryktsokzawy tsimykaranaha. Hawa Deus mytsaty mynakara tsipinymyrykynaha zuba. Nawa tubabatu Deus harere papeu humo botu ziwatahaka. ³¹ Usta harere aba zuba tihi:

— Ahatuktsa pauktsitsa tynasipokzitsikinaha, ahumo tsinakaranaha watihi. Iwa tubabatu Moises Deus harere papeu humo ziwatahaka. Anaharere petoktsa abazubatsa maha iwatsahi anaharere bo hyĩ tsimykara — Sesus niy.

³² Iwaze Sudeu ziwatahakata nitsaso:

— O myhyrinymyrytsa hawa ty tsimykara wasani my. Deus estuba zuba, koiknybakta tu atahi Deus babata. ³³ Katsa ibo tsimykaranaha tihi. Atahi abazubata my. Ibo zuba mytsatyziu tsimykaranaha tihi. Ihumo mymypokzitsirētsa babatsa. Iharere bo zuba hyĩ tsimykaranahaktsa. Mypaikrētsa itsyhyrypeze myhyriziktsokzawy tsimykaranaha. Hawa Deus mytsaty mynakara tanymyry zuba. Iwaze mytuktsa pauktsitsa tysipokzitsikinaha my humo tu tsinakaranaha wa tihi. Ana harere aba zuba. Katsa siraratsa nisibanahaze Deus bo isty nyny tsimykaranaha. Wasani my. Siraratsa tsimysikorobanahaze iwaze Deus bo nyny tsimykaranaha. Wasani my. Katsaktsa iharere bo hyĩ tsimykaranaha zeka ana humo hi wasani babatsa tsimykaranaha Deus myhumo tsakurēta mozik — niy.

³⁴ Sudeu ziwatahakata nitsasoziuku iwaze Sesus ipe niy:

— Ikia Deus tyryktsa tsimozik tsihikik abanury tu tsimozik — niy.

Iwatsahi kytsa iharere pokso sisikpybyrētsa. Batu — Hawa sa tsimy niahazo — nikaranaha.

Deus zipehata Dawi tsekokata atsatu sa.

³⁵ Iwaze Sesus Deus wahoro zubata eze nisi-hyrynymyrykyze ispe niy:

— Hawa Deus harere hyrinymyrytsa Deus zipehata Dawi tsekokatsa mozik. ³⁶ Tubabatu Dawi Deus hyrikoso humo nitsaso.

Deus pehatsa pe: “Kapanuryk taba dyhyty!

Bykyzehu utakta Deus asukyrytsitsa apyrytsa pukezi typykyk apokso sipybyrëtsa” niy.

Iwa Dawi Deus hyrikoso humo ziwatahaka.

³⁷ Tubabatu Dawi hi Kiristu Deus zipehata pe “Kapehatsa” iwatahi Deus zipehata Dawi tsekokatsa hÿ ata kino ipehatsa niwatihi — Sesus niy.

Kytsa sizubarëtsa iharere humo sakurëtsa niyziknaha.

Sesus Moises harere hyrinymyrytsitsa soho — Pykyhytu tahaktsa kytsa! — niy.

³⁸ Sesus nisihyrynymyrykyzo. Atahi:

— Moises harere hyrinymyrytsitsa humo pykyhytutaha kytsa! Asaktsa tahasuk humo tisapyrëna ty zuba siakparawy.

“Katsa zuba mysapyrëtsa” mybarapetu nikaranaha. Anasapy kytsa sinamy pihuakaknaha, anaeze kytsa zihobyknahaze sibo nitsasoziukunahaze ana kino siakparawy.

³⁹ Sudeutsa wahoro eze sidyhydyhywytsa sisapyrëtsa zuba siakparawy. Tahamyikahanaha zeka isapyha zuba siakparawy. Sisorokrëtsa. “Katsaktsa wasani tsimykaranaha” mybarapetu nikaranaha.

⁴⁰ Asahi maku nihyrikosokdaze haramukuka namy piaksenaha. Okyrysaro piaksenaha. Asahi kytsa okzeka Deus bo mopamykysokonahaze

sipapatu haramukukaka namy piaksebanaha. Kytsa okzeka ihyritywaha humo zuba, Deus sihumo tsihyrinymyrëta. Atahi sinini ykarawy bo mysipehahik anaeze tahawahi mynapykyryknaha — niy.

Haramukuka okyrysaro ty ikatyhi nynybaik niy. Ana bo hi Sesus iksa niy.

⁴¹ Kyze Sesus Deus wahoro zubata isturupeze okyrysarosuk baze nidyhyky. Kytsa okyrysaro suk bo zipopokonaha ana bo hi nikozone. Sinamyrëtsa okyrysaro tsizubarëna ty poktohi nikaranaha.

⁴² Iwaze haramukuka bo iksa niy. Inamyby-itatsa tu okyrysaro suk bo korok niy. Atatsa okyrysaro suk bo okyrysaro kaha tihi petok tsibik zuba korok niy. ⁴³⁻⁴⁴ Iwaze Sesus zinymyrykynahatsa pe:

— Totsohi bo iksatahaktsa! Atatsa okyrysaro tsizubarëna ty nyny niy, iwatatsatu petok tsibik korok niy. Sinamyrëtsa okyrysaro tsizubarëna ty nyny niaha iwatsa tu siokyrysaro kino kyhybyri habara ziknakara. Atatsa katsa batu. Inamyby-itatsa tu okyrysaro ty tadisahawy huakaty nynybaik niy. Deus okzeka ikahatyhi okyrysaro ty nynybaik niy. Atatsa hi okyrysaro ty nynybaik tsihyrizikporëtatsa nikara — Sesus niy.

13

Deus wahoro zubata mynakbi Sesus niy.

¹ Kyze Sesus Deus wahoro zubata ekze zinymyrykyta ipe niy:

— O myhyrinymyrytsa iktsa tykta. Haraharetsa sisapyrētsa sibuzurētsa. Deus wahoro zubata ipamabita — niy.

² Sesus:

— Yhÿ. Haraharetsa bo iktsa ty. Aibatohi haraharetsa ba harape bete zozo zikaha. Haraharetsa mynatōtōbaiknaha, iwaze Deus wahoro zubata nakarakbaik — niy.

Sininikarawy isukyrywy aha.

³ Bykyze Sesus nidyhyky. Oriwerejatsa hara eze nidyhyky. Deus wahoro zubata bo inakozo. Iwaze Peduru, Tsiaku, Suão, ãdere iwatsa ibo nipamykysokonaha. Asazubatsa ibo nipamykysokonaha.

⁴ — Hawaze Deus wahoro zubata mynakarakbaik amy ty sa tsimymyhyrinymyry ana hi mybo tsipiwatawy — nikaranaha.

⁵ Iwaze ispe niy:

— Pykyhytutaha! Kytsa pahaspihikbataikiknaha hÿ. Siharere bo ka waby waby byitaha! ⁶ Sizubarētsa mozumunahaze pahaspihikbatanaha “Utakta Kiristu Deus zikpehata maha” mybarapetu mykaranaha. Siharere batu wasani my situka pão pão byitaha — niy.

⁷ Tsiwabykynahaze kytsa nokponi mysibanaha, kytsa bytykara eze kino niwatihi mysibanaha. Ahapybybyihu ja iwa my zeka mybarawy ipykaratu.

⁸ Nanabyi tabatsa myharape sukyryikiknaha. Nanabyi taba usa koikny mybarawy taba mytydydykyk tu. Kytsa sizubarētsa taharapa piyknaha.

Batu sidisahawyky iwa myziakbataka mysinini-naha.

⁹ — Pykyhytutaha! Botu ahabo iktsaso. Kytsaharerewabytsitsa bo pahaoktyhyryknaha. Sudeutsa wahoro eze pahamyijakanaha, kapokzi pahakikinaha. Tahapehatsitsa bo pahaoktyhyryknaha. Ikiyahatsa siokeze tu kaharere tsimytsasonaha.

¹⁰ Taparaka wasania ty myzubaha bo tsimytsasonaha bykyze zuba mybarawy mopykba. ¹¹ Ahatsipa humo pahaoktyhyryknaha. Sipehatsa okeryk pahaoktyhyryknaha zeka ahaharere soho mytsaty mytsaty byitahaktsa! Sipehatsa okeryk tsimytsasonaha zeka Deus pahatsumuẽhĩ. Deus hyrikoso myzapikso izikwy humo tsimytsasonaha iwaze ahahyrinymyrẽtsa hỹ. Ahasukyrytsitsa ahaharere ba ziaksenaha — niy.

¹² Iwaze atukytsa siharerewabymybarẽtsa tu maku tahatsy ty sisukyrytsitsa bo mysioktyhyryknaha iwa mysibanaha. Sizotsa tahahyrytsa sisukyrytsitsa bo mysioktyhyryknaha iwa mysibanaha. Sihyrytsa kino niwatihi tahazotsa humo tahakyrikinaha sisukyrytsitsa bo mysioktyhyryknaha iwaze mysibanaha.

¹³ Ikiyahatsa kahumo ahaspirikporẽtsa iwatsahi kytsa ahahumo tahakyrikinaha. Atakta tsipuni-hikrẽta tu tsimysapyrẽta mozik. Aty sinini mykara zeka iwatahi tsipunihikrẽta mozik atakta tawahi Deus tuk mynapykyryk hỹ.

Sesus isapybyiwy soho nitsasoko ana humo hi kytsa sinini mykaranaha.

¹⁴ Sesus nisispirikpokoza.

— Iktsa tsimahaze isapybyiwy anahi imyrawy namymyikik, ana bo kino iktsa tsimahaze Deus wahoro zubata eze batu zetuba my! (Aty papeu pinymyryky siwabynahatsitsa bo pinymyryziuku!) Hawa myze asaktsa Serusarēhe eze tu Sudeja hara bo tywaknahaktsa!

¹⁵ Aty wahoro bete zeka paku paku byity, ba anamy zebyk.

¹⁶ Aty tatsuhuk ezeka awahoro bo ba eretezo asuk humo zikykta!

¹⁷ Wytykyryk sihyryzahaza sisukatsihikrēza mopykyknaha. Sijeza niwatihi tahabykytsa tuk sisukatsihikrēza mopykyknaha. ¹⁸ Deus bo tsimypamykysonaha:

“O myzo nawa puruze batu hyritsik tyziwō tsimyzapykyknaha.” tsimaha. ¹⁹ Amakata okoroze sinini tsimykaranaha. Deus mybarawy nizuknize kytsa anawa haty batu sinini niaha. Ba sininizo zikaha. Iwaze zuba nawa sinini tsimykaranaha.

²⁰ Deus siwatahawhyhysa pokzi nawa puruze mopykba. Batu mybara bo ka siwatahawhyhysa pokzi. Nawa puruze mopyk byizeka batu aty tohi ispitutsa ba zikapykyryknaha.

²¹ — Aty ahabo motsaso zeka “Iktsa tahaktsa! tabo Deus zipehata Kiristu maha” iharere bo ka ba hỹ tsimaha. Usta ahape my zeka “Nabo Kiristu my” iharere bo ka ba hỹ tsimaha.

²² Kytsa sizubarētsa mozumunaha. Asa tihi: “Utakta Kiristu maha” pahaspihikbatakanaha. Kytsa sizubarētsa siharere bo yhỹ mykaranaha. Mymyspihikbataikiknaha zuba. Mektsa

tu mozumukunahaze “Katsaktsa Deus sohokotsa maha” mybarapetu mykaranaha. Siwatahawytsa mykaranaha ana humo hi kytsa mysiakmyiwykynaha. Deus watawyhytsitsa mysiakmyiwy tsihikiknaha.

²³ Iwatsahi pykyhytutaha! Hawa mykara naha botu ahabo motsasoko iwatsahi ahaspirikpohuja!

Uta Deus zikpehata ahawata ikyzik myziksizo.

²⁴ — Bykyze sininikarawy mopykze nanabyi iwatawy natakaha. Bijoikpe eze iwatahawy natakaha. Haramwe mybe. Miwa zuba byzoje kino niwatihi myhyrizikubyri.

²⁵ Byrisoiktsa mynatsunaha. Bijoikpe iknyktsa mytydydykyryknaha.

²⁶ Iwaze uta mynasikze kabo tsimykozonaha. Utahi Deus zikpehata ahawata bijo oksĩ tuk kabo tsimykozonaha. Mynasikze kamysapyrēta, kahyrizikporēta, kazikwyrēta ana kino kytsa sizubarētsa mytsaty mykaranaha.

²⁷ Iwaze bijoikpe iknyktsitsa Deus tsumuēhĩtsitsa mysipeha. Siwatawyhytsa bo mysipeha. Nanabyitaba siwatahawyhytsa mynakypyknaha — niy.

Iwa Sesus tuk zinymyrykynahatsa bo nipamykysoko.

Umaha soho humo nisiwatawyky.

²⁸ — Umaha bo iktsa tsimykarannahaze ana soho hawa pahawatawy tsinymyrykynaha. Umaha taypykze tapara isarapatsa ytsik humo tasaropok iwaze moziponaha. Iwaze ikiahatsa:

“O hyritsik abaka jokboha” tsimykarannaha. Ahahyrinymyrētsa. ²⁹ Iwaha hi sinini

tsimykarannahaze utakta mynasik ana humo hi ahahyrinymyrëtsa hÿ. Wasani my.

³⁰ Kaharere ka wasani hÿ wabytaha! Abaktsa kytsa amy ty motsasoko pinymyrynaha. Kaharere atsatu mykara iwaze zuba mohyrikosokdanaha.

³¹ Bijoikpe mybarawy ahaka mohokda. Kaharere ka ba zikokza. Ba nawa taize ja zikaha ba zikpyk. Kaharere ka tawahi mynapykyk — iwa Sesus tuk zinymyrykynahatsa nisihyrinymyryky.

Sesus myziksizo naha humo batu aty tohi ihyrinymyry.

³² Sesus:

— Utakta myziksizoze batu aty tohi nawa taize ja ziky ba sihyrinymyryhy. Batu aty tohi sinini ykarawy bo myze ba ihyrinymyryhy. Bijoikpe iknyktsa Deus tsumuëhÿtsitsa kino ba sihyrinymyryhy. Uta kino Deus tse babata tu batu kahyrinymyryhy. Kazo zuba tsihyrinymyrëta.

³³ Iwatsahi tsimyziperykynaha! Tykymybanahaktsa! ³⁴ Hana wa okoroze sinini okarawy mozumuze maku wata. Atahi meky botu moparak. Taparaka tatsumuëhÿtsitsa sihyriziktsokdawy humo mysipehare. Hokbowy perytsitsa nisipeha. Iwaze tawahoro ekze niparak.

³⁵ Iwa tsiperynahaktsa! Zihitsa myziksizo naha humo batu sihyrinymyry. Kyze punubaze ja myziksi, unopokte ja myziksi, nakokze ja myziksi, zokorobyi tu ja myziksi. Batu ahahyrinymyry.

³⁶ Atsoko myziksizo zeka batu ahazika. Iwatsahi tsiperykynahaktsa! ³⁷ Hawa ha ty ahape mykara

atsatu sizubarētsa pe mykara. Ahazikara byihuja tsiperykynahaktsa! kytsa — niy.

14

Sesus zibeze tsihikiknaha.

¹ Aba petok puru nahawaze simyikaha asiba inakymy. Simyikaha atsikara ipytowybara ty zikziokoknaha. Simyikaha eze Deus taparaktsa nisitsumuēhī bo mytsaty ziknakaranaha. Iwaze Deus wahoro eze ziknapamykysokonahatsitsa, siwatahatsitsa kino niwatihi Sesus ziberikinaha. Sisukyrytsitsa niaha. Itsipa humo zioqtyhyryk tsihikiknaha. Tabezehikta nikaranaha tsahi kytsa papatu asahi Sesus zibeze tsihikiknaha. ² Asa hi:

— Mymyikaha eze tuze ba Sesus zibezenaha. Kytsa pokso mypybyrētsa. Tspibezenaha zeka iwazeka kytsa mymybabanaha. Sizubarētsa niakmyinaha — nikaranaha.

Sesus Betanija hudikhudikwy eze.

³ Sesus Betanija bo zumu. Tapara Simaõ iakōrōrōta zizororowyta wahoro bo nitsuk. Tahadisahakanahaze wytyk inatsuk. Atatsa jokmorēnikia ty taoporosuk arabastero harahare hi, tsipokzitsarēna niy. Narado inarokoha tsipokzitsarēna ty. Atatsa Sesus boze taoporosuk zisoiktsakik iwaze jokmorēnikia ty iharek bete ziharasusuku. Iwa nikara.

⁴ Iwatsahi wastuhu sakzohotsa ihumo tahakyrikinaha. Tahasakparekenaha:

— Amy skaraba jokmorēnikia ty piharasusuku — asa zuba nipamykysonaha.

⁵ — Jokmorēnikia tsipokzitsiarēna. Katsaktsa jokmorēnikia ty tahuak zeka okyryrsaro

tsizubarēna humo, 300 denario tsimaha. Iwaze okyrysaro ty sinamybyitsa bo nyny tsimaha zeka wasani tsimaha — nikaranaha. Iwa zibetsakaknaha.

⁶ — Awatu betsak betsak byitaha! — Sesus niy. — Atatsa hiba wasani mykara. Amy humo sa tsipesuka tsihikiknaha nikara kahumo tisapyrēna niy. ⁷ Sinamybyitsa ahapauk baze mopykyryknaha zeka sibo nyny tsimaha zeka wasani my. Utakta kabo ka ba nyny zikaha. ⁸ Abanurytu pikbezenaha. Mohyrikosokda. Atatsa kanury ziharasusuku iwaze kaytyk bo mokymy — niy.

⁹ — Kaharere tsiwabyziunahaktsa! Nanabyitaba Deus wasania ty myzubaha bo motsasokonaha. Hawa atatsa niy ana ty hi nanabyitaba inapamykysokonaha niwatihi iwaze sizubarētsa atatsa soho bo mytsaty mykaranaha — niy.

Sudas Sesus sukyrytsitsa bo niy.

¹⁰ Kyze Sudas Iskariotses isopyksapybyita tu mykara. Sesus tuk zinymyrykyta iwatatu Deus wahoro eze ziknapamykysonahatsa taparaktsa bo zumu ispe niy:

— O Sesus batu ahakparawy. Tsipibeze tsihikiknaha. Uta pahatsumuēhī. Bykyze uta hi ibo pahaoktyhyryk — niy. ¹¹ Iwaha ziwabynahatsa sakurētsa nikaranaha:

— O ikia tsimymytsumuēhī zeka okyrysaro ty abo nyny tsimaha — niaha.

— Yhŷ. Bykyzehuta! Aba ibo piksizo — niy.

— Yhŷ. Tsipiksi za — niaha. Iwaze Sudas mytsaty nikara:

— Hawa sa Sesus bo mysioқтыhyryk. Yhŷ ja. Bykyzehu — niy. Ziperyky zuba.

Sesus tuk zinymyrykynahatsa myikaha ty tadis-ahaka.

¹² Kyze Sudeutsa simyikaha mozumuze zinymyrykynahatsa ipe niaha:

— O Sesus hana eze sa mymyikaha tsipikymynaha Hana eze sa ikia tuk karaneru tsani tazobaze tsimymydisahanaha — niaha. Amyikaha bo pororo ziknakaranaha Deus Sudeutsa taparaktsa ziknasitsumuëhĩkĩnahatsa bo mytsaty ziknakaranaha.

¹³ Sesus ispe niy:

— O nabo tsimykaranaha kytsa. Ikiahatsa petoktsa nabo Serusarëhe hudikhudikwy bo tsimytururuknaha! Anaeze maku pihik suk pebykykyrykta bo tsimykozona. Pihik myzizokota hapikta! Wahoro bo mytsukze, iapik tu paku paku tsimaha! ¹⁴ Tsihitsa pe:

O myhyrinymyrytsa “Hana eze sa amyikaha eze mydisahawy ty katuktsa tuk hauk tsimaha my” tsimahakta! Iwaze ahape my “Iktsatahaktsa”!

¹⁵ Wahoro jobo tsimydokoknaha, pokpedawy bo pykyhytu mydyhydyhywy bo iktsa tsimaha. Mysapy eze inakymy. Anaeze mymyikaha katsa mybo inakymynahaktsa! — niy. Yhỹ niaha.

¹⁶ Iwaze zinymyrykynahatsa petoktsa nitururuknaha. Serusarëhe bo izumunahaze hawa ty Sesus botu nitsasoko, atsatu niaha. Nawa tahamyikaha zikymynaha karaneru tsani zizobanahaze.

¹⁷ Kyze zunubaze Sesus ustsá zinymyrykynahatsa tuk zumukunaha, mytsyhyrytsa watsa tuk izumuku. ¹⁸⁻²¹ Tahadisahakanahaze Sesus ispe niy:

— Ahatuk estuba:

“O Sesus kaharereziuwbyita my. Abaka batu Sesus tukta my” mykara.

Iwatahi kasukyrytsitsa tuk kabo tynasioktyhyk. O bykyze atakta sinini myze zikpuruk byizeka wasani my. Imyspihikbatanikita tu Deus zipehata mywata humo sinini mykara. Ana hi Deus botu ziwataha — niy. Iwaha ziwabynahatsa hi batu siaku:

— O aty skaraba. Uta kino batu. Uta kino batu.

— nikaranaha. Sihyrinymyrybyitsa tu sibo Sudas soho nitsasoko. Sesus:

— Estuba katuk tamihi ty sok mytahi imyspihikbatanikita — niy.

Hawa Sesus tuktsa ihumo mytsaty mykaranaha.

²² Kyze tahadisahabanahaze Sesus atsikara waha ty okok niy. Deus pe niy:

— Ikia humo ka mykurëtsa — niy. Atsikara zitsatsakak. Sibo zibiakak:

— O hauk tahaktsa, naty hauk tsimahaze, kanury soho bo mytsaty tsimaha, “Sesus mysapyzoky nihyrikosokda” tsimaha — niy. Iwa ni-aha.

²³ Iwaze taoporosuk duabohotsa tsik ty okokzo niy. Deus pe niy:

— Ikia humo ka mykurëtsa — niy. Iwaze sibo nyny niy.

²⁴ — O naka kaspu waha. Tsimyzikukunahaze kaspu soho bo mytsaty tynakaranaha. Kaspu mopuku iwaze Deus ahasoho pe my “Sisopyksapybyitsa humo mysiokzo iwatsahi kaokzeka meky watu moziknaha” Deus mykara. ²⁵ Uta aba zuba

duabohotsa tsik piku. Pikuzoze kazo tuk kytsa tuk asaktsa kaharere bo hyĩ mykaranaha, katyryktsa moziknaha — niy. Iwaze sizubarẽtsa duabohotsa tsik zikukunaha.

²⁶ Kyze unata eze Deus bo nisakibazikiknaha:

— O Deus ikia tsamysapyrẽta — nikaranaha. Kyze Deus bo nisakibazibanahaze ape bo ziponaha. Hara jobonita bo Oriwereja inarokota bo niukurunaha.

Sesus Peduru nizukpeheze — O batu Sesus kanyhy tsimy — niy.

²⁷ Nakpo zukzuk niahaze. Sesus ispe niy:

— Utakta aba pikbezenaha. Pikbezenahaze, batu aty tohi katuk mopykyryk. Kasukyrytsitsa pokso tsimywaknaha. Deus harere botu ziwataha “Hozipyrykzatsa irarakata pibezenaha iwaze myraratsa mowakbaiknaha” iwa Deus harere botu kahumo ziwataha. Utakta hozipyrykzatsa irarakata wata. ²⁸ Mynahyritzikpoze ahaharaze Karireja eze pahapery — niy.

²⁹ Peduru:

— O batu. Usta kytsa ja. Utakta batu. Uta kino atuktu mopykyryk.

³⁰⁻³¹ Sesus:

— O Peduru aba unata eze harakykbyi kasoho “Batu Sesus kanyhy” tsimyspihikbata, kokuaro petok nipuze iwa tsimyspihikbata. Iwa ba zabezenaha — niy.

— O niwazubakta. Abaze pikbezenaha zeka:

“Utakta Sesus tukta” my — niy.

Kytsa sizubarẽtsa kino niwatihi nikaranaha.

ikiahatsa batu ahapunihik iwatsahi Deus bo ty-pamykysonahaktsa — Sesus niy.

³⁹ Atsa botu ziksizoze, Deus bo nipamykysokozo:

— O “Tyhyrikosokdakta!” tsimy zeka, kazo, utakta mohyrikosokda — niy. ⁴⁰ Siboziksizoze, zurubaikzonaha. Tahaõtutsaspyk nikaranaha. Sesus:

— O tsipuruziukunaha zuba — niy. Batu harere zikaha.

⁴¹ Bykyze Deus bo nipamykysozoze siboziksizo.

— O abaze sihi tsikahabyrynaha. Abaka ba zikumunaha. Abaka utakta Deus zikpehata ahawata ikyzik kasukyrytsitsa bo pikoktyhyryknaha niy. Abahi pikbezenaha. ⁴² Kyikytkta! Tupaktsa! Abaka imyspihibatanikita mozumuku. Kasukyrytsitsa kabo tynasioktyhyryk.

Kytsa Sesus tsipa humo ziockyhyryknaha.

⁴³ Ana hi nitsasokoze Sudas ibo izumu. Sudas zinymyrykyta tu siharereziubyitsa tuk izumuku. Sesus bo inasioktykyryk. Tanoratsa upepetsa iwatsa tu nasebykyknaha.

⁴⁴ Tapara Sudas ispe niy:

— O Sesus piwatawyze piharapyrykze ahanyhybyitsa tsipinynaha kytsa. Atahi piharapyryk! Iwaze itsipa humo tsioktyhyryknahaktsa! — niy. Taparaktsa Deus wahoro eze ziknapamykysonahatsa nisipeha Sesus pioktyhyryknaha, Moises harere hyrinymyrytsa, Sudeutsa taparaktsa kino niwatihi nisipehanaha.

⁴⁵ Iwaze Sudas Sesus bo zuk niy. Sudas:

— O ikzumukta kahyrinymyrytsa — niy.

Iwaze Sesus ziharapyryk. ⁴⁶ Kytsa Sesus zioқтыhyryknaha. ⁴⁷ Ipaukbazekta Sesus tukta tasokorotsapu izibok. Maku spi zizykik. Atahi taparakta maku ziknapamykysokota Deus wahoro zubata eze tsumuēhĩtsa. ⁴⁸ Sesus ispe niy:

— Amo skaraba tanoratsa ahaupetsa iwatsa tsiknasebykyknaha. Awatutaha. Utakta katsyhyryboabyita. Batu kakyri. ⁴⁹ Ahatuk zikzuruku. Ikiahatsa tuk Deus wahoro zubata eze zikzahyrinymyryky. Iwatsa tu batu katsipa humo katy oktyhyryk. Deus harere botu ziwataha it-syhyryboanikita wata katsipa pikoktyhyryknaha. Aba zuba katsipa humo tsipikoktyhyryknaha — niy.

⁵⁰ Iwaze zinymyrykynahatsa niwakbaiknaha. Tahapybyspyk hi niwakbaiknaha. — Iwa zeka mymybabanaha — niaha.

⁵¹ Itsipa humo zioқтыhyryknahaze mykyryburukta Sesus hapik niukuru. Atahi niwakik panu ty irikpidiwyhyta niy. ⁵² Nizokbatsinaharēta tu niwakik. Tazikpidiwy zuba sibaze zereke. Iwatahi isukbyitatu niwakik.

Kytsa Sesus kytsa harerewabytsa bo zioқтыhyryk.

⁵³ Kyze Sudas tuktsa taparakta ziknapamykysokonahatsa tuk myhyrizikwanikita wahoro Sesus zioқтыhyryknaha. Taparaktsa kapitaōtsa watsa Moises harere hyrinymyrytsitsa kino niwatihi anaeze niapykyryknaha. Sizubarētsa inakypyknaha.

⁵⁴ Peduru tsipybyrēta hi ěrykani iapik inaukuru. Taparakta wahoro sturupe eze nitsukze iwarik-spyk sodadutsa baze nidyhyky izo baze niakpyzazaka. ⁵⁵ Iwaze taparaktsa Deus wahoro ziknapamykysonahatsitsa. Sudeutsa taparaktsa Moises harere hyrinymyrytsitsa ahatsa inakypyknahaze kytsa harere ziwabynaha. Asahi:

— O kytsa Sesus soho pisapybyrikinaha iwatsahi pibezenaha — anahi mozihihiknaha. Siharere meky watu nitsasokonaha. ⁵⁶ Iwaze wastuhu kytsa ispe:

— Sesus harere batu wasani — niaha. Utsa kytsa batu yhy niaha. — O batu imysapy — niaha. Isoho nimyspihikbataikik. Mekywatu nikaranaha.

⁵⁷ Wastuhu niriktotohokonaha. ⁵⁸ Asa tihi:

— Katsa iharere tsiwabynaha mype niy:

“Utakta Deus wahoro zubata anahi kytsa nizukninaha myzipyk bykyze petok puruze usta wahoro mozokni anahi kytsa batu mozokninaha” Sesus niy, anahi tsiwabynaha — mybarapetu nikaranaha.

⁵⁹ Ana ty hi metutu nitsasokonaha iwatsahi Kajapas:

— O mybarapetu mykaranaha — niy.

⁶⁰ Nitsasobanahaze, Kajapas sibaze tarikto:

— Amo Sesus. Kytsa asoho nitsasokonaha anahi tsiwaby. Hawa sa tsimy — niy.

⁶¹ Sesus batu harere. Iwaze Kajapas ipe niyzo:

— Hawa sa Sesus. Ikiahi ja Deus zapehata. Ikiahi ja Deus bo tsimymyoktykta. Ikiahi ja Deus tse — niy.

62 — Yhÿ. Deus zuba izikwyrënikita. Utakta Deus zikpehata ahawata ikyzik. Ibaze tuze mybarawy ezektsa bo zikpeha. Iwaze mybarawy bo mynasik. Aba uta Deus bo mydo. Ibaze tuze bijoikpe eze tu, kabo iktsa tsimaha iwaze mybarawy bo bijo satata tuk mynasikzo — niy.

63 Kajapas ana harere ziwabyze tsiakyriukrëta niyzik. Iwaze isuk zisykik nawa ziwatawy takyriki.

64 — O soso byitaha ba ziktsasonaha! — niy.

— “Utakta Deus wata” my. Iharere botu tsiwabynaha hawa sa ity tsimaha — niy.

— Tabezehikta! Tabezehikta! — nikaranaha.

65 Iziakbatakanahatsa zehezozokoknaha, zihyriwikwarakanahaze iwaze hi nitsakikinaha.

— Aty skaraba zaki — nikaranaha, zimyi-jakanaha. Isperytsitsa kino niwatihi nitsakikinaha.

Peduru Sesusta batu kanyhy nikara.

66 Peduru wahoro peze nidyhyky. Anaeze myhyrizikwanita tsumuëhÿtsata ziharamuze.

67 Atatsa Peduru izo bo niakpyzazaka ibo zinytokto, iwaze ipe niy:

— O ikia tihi sa Sesus Nasare ezekta tukta tsiky — niy.

68 — O batu. Batu kanyhy — nikara. Iharere batu kawabyhy zispihikbata. Iwaze hokbowy baze zumuzoze kokuaro nipo.

69 Atatsa ibo nikozoze ustsä kytsa pe niy:

— O ata tihi kok Sesus tuk zinymyrykyta — niy. Iwa niyzoze:

70 — O batu — mybarapetu nikara. Bykyze ustsä:

— O atatsa nitsasoze wasape hi niaha. Ikia ti-
hiba Sesus tukta ikia kino niwatihi Karireja ezekta
— niaha.

⁷¹ Peduru tsipybyrēta nikara:

— Batu kanyhy. Aty skaraba Sesus batu
itukta Deus kaharere piwabyky iwatahi kaharere
wasani byizeka Deus piksininiwyky Sesus batu
kanyhy — Peduru nikara.

⁷² Iwa nitsasokoze kokuaro nipozo. Peduru
mytsaty niy. Tapara Sesus kape niy:

— O kokuaro ipozoze: Harakykbyri kasoho
“Batu Sesus kanyhy” tsimy kara — niy.

Peduru ana bo hi mytsaty niyze nipuziuku.

15

Kytsa Sesus Piratus bo zioqtyhyryk.

¹ Kyze zokorobyitu Sudeutsa Deus wahoro eze
ziknapamykysonahaktsa, taparaktsa kapitāotsa
Moises harere nisihyrinymyrykynahatsitsa
iwatsa sizubarētsa inakypyknahaze hawa Sesus
tabeze nipamykysokonaha iwaze Sesus Piratus
bo zioqtykyryknaha. Taparaka zipawarakanaha.
Iwaze Piratus bo zipehahik. Piratus abazubata
iharere awatu zeka Sudeutsa ba zikbezenaha.

² Piratus ipe niy:

— O Sesus ikia ja Sudeutsa pehatsa — niy.

— Ikia tihi tsiktsaso — Sesus niy.

³ Taparaktsa Deus wahoro zubata eze zikna-
pamykysokonahatsitsa:

— O Piratus Sesus batu imysapy — nikaranaha.
Isoho humo zispihikbatakanaha. ⁴ Piratus ipezo
niy:

— Amo Sesus. Asoho humo zasapybyrikinaha. Tsiwaby sa. Iwa wasani sa — niy.

⁵ Batu harere tasoho humo batu harere. Iwatahi Piratus ata zuba tatu mytsaty nikara — O amo skaraba! Batu harere ziky, batu taokani! — niy.

Sesus tabezewy.

⁶ Tapara tahamyikaha eze Piratus maku estuba inazukenaha. Maku sizubarętsa sakyriukręnikitsa hurukwy eze tu. Situkta estuba nizuke.

— O aty sa myzuke — nikara. Atakta! Serusaręhe eze ktsa nikaranaha, yhŷ nikara. Iwa simyikaha eze ziknakara.

⁷ Serusaręhe eze kytsa niwatsoronaha iwaze sakyriukrętsa nitsahurukiknaha. Estuba sakyriukręnikitsa hurukwy eze Bahabas inarokota niy. Kytsa bakatsa niy. Ana humo hi nitsahurukiknaha. ⁸ Iwaze kytsa sizubarętsa Piratus bo zumunaha. — O aty sa tsimyzuke — nikaranaha. ⁹ Piratus:

— O ikiahatsa ista. Hawa sa tsimyzihihikiknaha. Sudeutsa pehatsa za myzuke Sesusta tsimysapyręta! — niy.

¹⁰ Taparaktsa Sudeutsa tahakyrikinaha sizokdirętsa nikaranaha iwatahi Sesus ibo zioқтыhyryknaha ana humo hi Piratus tsihyrinymyręta.

¹¹ — O batu. Mektatukta! Bahabas zakta! — niaha. Iwa taparaktsa botu kytsa sizubarętsa pe niy:

— Ikiahatsa tsimaha zeka Bahabas. Bahabas tsimaha — niaha. ¹² Piratus ispe niy:

— Sesus ja. Hawa sa Sesus ty my. Atakta Sudeutsa pehatsa — niy.

¹³ Myzubaha tihi:

— Tabezehikta! Iharapatawyhyta humo tabezehikta! — nikaranaha.

¹⁴ Piratus:

— Amo humo sa. Amy ty sa imysapybara ty nikara — niy.

— Tabezehikta! Tabezehikta! — opykani kazi nikaranaha.

¹⁵ Iwaze Piratus: Yhỹ niy. Nawa myzubaha humo zuba harereziu tsihik mykara iwatahi Bahabas nizukehik. Sesus ta batu. Sodadutsa pe:

— O tytsakinahaktsa! Iharapatawyhyta humo tsibezehiknahaktsa! — niy. De.

Sodadutsa Sesus zimyijakanaha. Inisaha ty zitsorikiknaha.

¹⁶ Kyze sodadutsa Sesus tahawahoro isturupeze bo zioқтыhyryknaha. Sodadutsa zumubanaһaze Sesus zispihikbatakanaha.

¹⁷ Isuk tsaririta ty zisuknaha.

— O abaka Sudeutsa pehatsa abazubata! tsimy — zimyijakanaha. Inisaha ty zitsorikiknaha. Tubabatu nawa sisopyk. Sipehatsa mekywa tu sitorsik. Sesus ty ka inisaha ty zitsorikiknaha iwaze zimyijakanaha.

¹⁸ — O ikia Sudeutsa pehakatsa — zispihikbatakanaha.

¹⁹ Hwi ty ziharektotokoknaha, zihwezozokoknaha. Tahaekaratsa humo iokeryk puruk puruk nikaranaha, sipehatsa okeryk watsa iwa zisininiwyky. ²⁰ Zispihikbatabanahaze isuk tsaririta zibokiknaha. Isuk babata ty tysukzonaha. Iwaze ape bo zioқтыkyryknaha. Iharapatawyhyta humo tabeze nikaranaha.

Iharapatawyhyta humo zihyrikiknaha.

²¹ Ske buruk niukurunahaze, Simaõ nasihobyk. Atakta Sireni ezekta tatsuhuk ikny ziksikirita. Ihyrytsa Aresãdere Hupus ahatsa inarokotsa. Iwaze sodadutsa ipe niaha:

— O iharapatawyhyta tsebykta! — niaha.

²² Niytahi zebykyk! Iharekpokoso sapy inarokoha bo Sesus zioqtyhyryknaha, iharekpokoso Sudeutsa harere kokota maha. ²³ Anabo izumunahaze aty tohi mymyitsapyri hwi ty Sesus bo nyny niy:

— Tsõty — niy.

Batu niy. Batu tsõ.

²⁴ Isuk zibokiknahaze ziaksenaha. Sodadutsa harahare zipyryktsa ty nisipaparakanaha aty ja Sesus suk piakse nikaranaha tsahi ziwatawyky-naha. Iharapatawyhyta humo zihyrikiknaha, itsyhyry soikare eze zaza nikaranaha zihyrikiknaha, ipyrytsa ty kino niwatihi zaza nikaranaha zihyrikiknaha. Iwaze nepykbanahaze iharapatawyhyta ziriktonaha.

²⁵ Haramwe nazotoktoze iharapatawyhyta humo zihyrikiknaha. Zikymynahaze, iharapatawyhyta zitseknahaze ziriktonahaze.

²⁶ Iharapu bete iwatahaha ty. SUDEUTSA PEHATSA ziwatahakanaha iwa isoho humo hazi nikaranaha.

²⁷⁻²⁸ Kytsa petoktsa sityhyryboanikitsa ituk nisibanaha siharapatawyhytsa humo nisibanaha es-tuba ipanuryk taba usta ipawazo taba ahatsa niaha.

²⁹ Kytsa nabaze ske buruk niukurunahatsa, zis-apybyrikinaha hazi nikaranaha:

— O iktsatahaktsa. Taparaka zuba:

“Deus wahoro zubata myokarabaka bykyze petok puruze usta pizi tsikykara” abaka tsimiraka — nikaranaha. ³⁰ — Ikia tsahyrinymyrēta babata zeka, pany, tynasikta! Ba zikumuzakta — zimijakanaha.

³¹⁻³² Deus wahoro zubata eze zik-napamykysokonahatsa Moises harere nisihyrinymyrykynahatsitsa kino niwatihi nitsasokonaha:

— O ustsya kytza nisitsumuēhīkī, atahi ba ziktsumuēhī! Iwatatu sa pomoza Deus zipeha zeka “tynasikty”, Sudeutsa pehatsa babata zeka, ihara-patawyhyta ekze “tynasikta!” Iwa tsimy zeka:

“O Sesus hi Deus zipehata babata” tsimaha — mybarapetu nikaranaha.

Asaktsa ituk nihyrikosokdanahatsa asa kino niwatihi zisapybyrikinaha.

Sesus nihyrikosokda.

³³ Iwaze tokbaha eze miwa niyzik. Batu haramweke. Sudeja eze miwa niyzik.

³⁴ Iharakibikia bo zoize inaharamwezo. Iwaze Sesus:

— *Eri Eri rama sabaktani* — ana taharere baba ty huahua niy. Anatyhi myharere. — O Deus amo skaraba uta zuba tsipikarikik — niy.

³⁵ Ustsya kytza niaha:

— Amo sa Erias bo hua mykara — niaha.

³⁶ Tohi duabohotsa tsik ipokzitsibara ty itsārākbara ty morosuk eze ky ty tsikok niy. Anabo mazori waha ty duabohotsa tsik bo sokyk niy. Zipypyikik. Mazori waha ty hwi humo

korokbykyk jobo Sesus sak bo tsyk tsyk nikara. Atakta:

— Byriktsa, tozeka ja Erias mozumu, iharap-
atawyhyta humo piakse. Tsiperynahaktsa! — niy.

³⁷ Iwaze Sesus kakazo niyze zumuza.

³⁸ Iwaze panu ipamaba ipokpedawy Deus wa-
horo zubata eze ky nisykbaik. Tsapukte buruk
nisyk bijoikny tu niakskyryk.

³⁹ Sodadutsa pehakatsa tuk nikozone ihara-
patawyhyta okeryk niriktohoko Sesus iwa ni-
hyrikosokdaze atahi:

— O atahi Deus tse babata — niy.

⁴⁰ Wastuhu wytykyryk nizokparakanaha.
Maria Madarena, ustatsa Maria, Sarome, usiza,
iwa eryk tu nizokparakanaha. Maria hyrytsa Sose
Tsiaku jypykyhyzytykta iwatsa niy.

⁴¹ Asiza hi Karireja ikny ihumo simypokz-
itsiarēza nikaranaha. Usiza wytykyryk iapik
Serusarēhe bo zikzumukunaha za kino niwatihi
asiza nizokparakanaha: Zitsumuēhīekiknaha.

Sose Sesus ziytykyk.

⁴²⁻⁴³ Iwaze byiri Sudeutsa nawa zurunahaze
tahabyrykywy, nubaze Sose Arimeteja ezekta Pi-
ratus bo izumu. Sose taparakta Deus wahoro
zubata eze tu niy. Tsimysapyrēta atahi kytsa Deus
harere bo hyŷ mykaranaha ana hi mozihikik.
Batu pyby iwaze Piratus pe niy. — O Sesus nury
ty kabokta. Uta inury ty iytyk bo mytsahok — niy.

⁴⁴⁻⁴⁵ Piratus:

— Botu sa pŷ niy — niy. Iwaze sodadutsa
pehatsa pe niy:

— Sesus sa botu nihyrikosokda — niy. So-
dadutsa pehatsa ipe niy:

— Yhỹ pỹ — niy. Iwaze Piratus:

— Ikia za tsinazipik Sose. Iwaze tsimytsahok — niy.

⁴⁶ Sose panu kōpara niy inury inazipikze, panu ty ziaqwaraka. Tubabatu harahare yktaba nitsahoknaha, abaka anabo hi nitsahok. Harahare bobyri ihok bo zikorore. Zihokbore.

⁴⁷ Maria Madarena, ustatsa Maria, ahaza nizokparakanaha. Iytyk zinyrenaha.

16

Sesus inahyrizikpo.

¹⁻² Kyze petok zuruze, sabado nipykze miwa botu Maria Madarena ustatsa Maria, Tsiaku je Sarome, iwahaza iytyk bo niukurunaha. Jokmorēnikia bykyhy tuk. Niukurunaha zahi inury iokmorēnikia ty taharasusu nikaranaha. Anahi Sudeutsa sopykwy ty ziknakaranaha.

³ — O aty sa harahare mytsyhyryze pipetu nikaranaha. Titsakyrīkrēta hỹ. Aty skaraba mytsyhyryze sukyhy my — nikaranaha.

⁴ Iwaze nitururuknaha anabo zumunahaze iksa niaha, mektatu botu harahare bobyri zipetuhikare. ⁵ Iwaze iytyk bo nipupunaha. Anaeze maku bo nikozonaha, atahi nidyhyky. Tisukbarazarēta. Iwaze ipokso nipybybaiknaha.

⁶ Maku hi:

— Kapokso ahapyby byihujaktsa. Sesus Nasare ezekta atahi kytsa iharapatawyhyta humo zihyrizikiknaha tsipiberikinaha ana hi pinymyry. Atahi inahyrizikpo. Nabo isapy bo iksataha. Isapy zuba niapykyk. ⁷ Aidytahaktsa Peduru ustsā

zinymyrykynahatsa bo tynakozorēnahaktsa! ispe tsimaha:

“O Sesus inahyrizikpo. Aba tsipinynaha Karireja bo ahaharaze mykara hawa botu ahape niy” tsimaha — bijoikpe iknykta niy.

⁸ Iwaze wytykyryk puke puke niaha. Nitururukuknaha. Sipybyrēza ziksikirinaha. Nitydydykyknahaza tu paikpa mytsaty nikaranaha. Sipybyrēza nikaranaha iwazahi kytsa bo batu tyso.

Sesus Maria Madarena bo natakaha.

⁹ Sesus domiko eze inahyrizikpo tapara Maria atatsa Makadā ezektatsa bo inatakaha. Tapara Sesus hyrikoso sapybara sete nisiksiwyhikze. Atatsa ihumo nizororobabatatsa. ¹⁰ Iwaze atatsa itukytsa bo niy. Ipokzi nipuziukunaha. Atatsa hi:

— O myhyrinymyrytsa inahyrizikpo. Ispituzo my. Ikza inyzo — niy.

¹¹ Itukytsa iharere humo paze! nikaranaha. Inahyrizikpo naha humo ma ahabyitsa nikaranaha. Atatsa mybarapetu ja mykara iwa mytsaty nikaranaha.

Sesus tuk zinymyrykynahatsa petoktsa ahatsa bo natakaha.

¹² Kyze Sesus meky watu itahyrity niyzik petoktsa ahatsa bo natakaha. Niukurunahaze amytsī eze natakaha. Situk nipamykysoko. ¹³ Iwatsahi ziksizonaha. Itukytsa bo nipamykysokonaha. Siharere humo kino niwatihi itukytsa ma ahabyitsa nikaranaha. Asaktsa mybarapetu ja mykaranaha iwa mytsaty nikaranaha.

Sesus tuk zinymyrykynahatsa bo natakaha.

¹⁴ Iwaze zinymyrykynahatsa òse ahatsa bo natakaha. Tahadisahanahaze sibo natakaha. Ma zikahabyitsa nisibetsakak. Tahaoktsĩnahatsa humo nisibetsakak. Utsa harere humo inahyirizikpo naha soho batu ma ahabyitsa iwatahi nisibetsakak. ¹⁵ Iwaze ispe niy:

— Nanabyitaba tynakaranahaktsa! Sihudikhudikwy taba wasania ty abazubatsa bo tytsasonahaktsa! — niy. ¹⁶ — Aty kaharere bo hyĩ my zeka kahumo tispirikporēta mozik atahi imysapybara ty myzeka Deus piokzohik. Ata kino piharasuhikze iwatawyhyta katukta my, atahi Deus myzo bo pioktyhyryk. Aty kahumo ispirikpobyi zeka imysapybara ty my zeka ba ziocko, imysapybara ty nikara ituk tawahi mynapykyryk. ¹⁷ Asaktsa kahumo sispirikporētsa Deus zikwy piwatawynaha. Kahumo hyrikosotsa sapybaratsa tysiksiwyhiknaha. Mektsa harere ty mopamykysokonaha. ¹⁸ Pyryhyk ty paik maha zeka ba zikyrikosokdanaha. Tумы tsarawyhyha ty pikunaha zeka ba zikyrikosokdanaha. Simyitsapyritsa tahatsyhyrype ty tsika maha zeka, mysizororowy sakurētsa moziknaha — Sesus niy.

Sesus bjoikpe bo nido.

¹⁹ Taharere nitsasobaze jobo bjoikpe bo Deus ziockyhyryk. Tazo tuk ipanuryk taba mynadyhyky niy.

²⁰ Iwaze itukytsa nitururuknaha. Nanabyitaba Deus wasania ty natsasokonaha. Hawa ha ty kytsa batu zikaha ana ty hi Deus zikwy humo nikaranaha. Iwatsahi kytsa siharere bo hyĩ

niahaze Sesus humo sispirikporētsa niyziknaha. Sipehakatsa hi nisispirikpoko. Deus zikwy humo ziwatawykynaha, Sesus nisitsumuēhĩkĩ iwatsahi myzubaha siharere bo hyỹ nikaranahaze Sesus humo sispirikporētsa niyziknaha. Niwazuba.

Deus Harere Aibaky Sesus mymyspirikpoko naha

New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

2f0260ea-5969-5180-9ac5-183d63a989f1